

東
華
續
錄

東華續錄

乾隆七十四

臣王先謙敬編

臣周瀚蕃恭校

秋七月甲辰諭軍機大臣等阿爾泰等奏小金川土舍圍攻沃克什請臨以兵威以挫其氣一摺所見甚是已於摺內批示矣蠻夷自相仇殺雖屬常情不值煩我兵力但小金川去歲與沃克什構釁占據其地經阿爾泰等親往飭諭業已遵奉退還乃爲日無幾復敢稱兵侵擾似此怙惡不悛非復可以理喻且見在金川與革布什咱之事尙未辦完小金川又復效尤滋事此而不加以懲創伊等將視內地大臣事務調停和事不復知所畏忌於撫馭番夷之道甚有關係小金川地方非若金川之險要今董天弼旣親往該處甚爲合宜竟當統兵直搗其巢穴或以計誘致或竟以力取

將僧格桑擒解省城候旨另擇馴謹奉法之人立爲土司安撫其地若僧格桑聞董天弼親至其地仍來求見卽設法誘擒亦無不可斷不可仍以和解了事庶徼外頑番稍知儆惕不復敢構怨相殘且可使金川聞風震懾稟受教約斂迹歸巢自爲一舉兩得將此傳諭阿爾泰董天弼知之其兩處辦理情形若何均著由驛迅速馳奏○乙巳命侍郎桂林帶庫銀一萬兩赴古北口會同提督王進泰撫恤水災並開倉平糶○丁未諭原任建昌道張若淳於辦理安南國黃公纘一案不詳細稟商上司輒以州境並無其人率令該州移覆殊失信外夷之體固屬咎有應得第念伊係大學士張廷玉之子見在張廷玉子孫無名列仕籍者殊爲可憫張若淳著加恩免其治罪以四品小京堂用○諭烏什駐紮辦事侍郎旌額理病故殊堪憫惻著加恩賞給都統銜仍賞銀五百兩治

喪所有應得卹典著該部察例具奏○大學士管四川總督阿爾
泰奏據明正土司甲勒參得沁稟稱僧格桑本與土司郎舅素好
因僧格桑發兵圖攻沃克什土司屢勸藥石成仇見發兵將土司
納頂等寨占據小金川如此跋扈本宜卽加攻剿但革布什咱之
事未完沃克什之圍未解四面疲我兵力亦爲非計見令明正土
司於要隘撥兵防守計提臣此時已到沃克什或小金川畏懼斂
兵則可相安無事如敢抗拒急宜襲擊臣亦於南路夾攻使其首
尾受創得旨所奏已遲○以邁拉遜爲吏部右侍郎由內閣學士遷○戊
申 上啓鑾秋獮木蘭○免經過地方本年額賦十分之三○辛
亥以密雲白河水漲橋梁未成 上回鑾○撥庫銀五十萬兩於
直隸備用○壬子諭軍機大臣等小金川因金川與革布什咱相
仇敢於效尤滋事其情甚爲可惡就兩處情形而論亦判然不同

朕意宜先辦小金川擒其兇渠治以重罪則金川自當聞風畏懼
斂迹歸巢斯爲一舉兩得阿爾泰何竟見不及此且前此進剿金
川至今不過二十餘年從前隨征弁兵必有存者小金川路徑自
所熟識卽可用爲嚮導更無難於深入若籌及兵力或有不敷則
檄調滿漢官兵士練約足五千人並非難事前降諭旨甚明此外
復何顧慮至阿爾泰督兵攻剿原非所長但將領中豈無勇敢明
智堪以帶兵者阿爾泰須就近隨時調度示以機宜更不得諉爲
力所不給此時自宜速與董天弼商酌剋期兩路夾攻剿擒僧格
桑相機而行務在必得此事方能完局豈可稍涉游移耶阿爾泰
初奏言僧格桑非可復以口舌化導令董天弼前往西路酌量進
兵頗爲有見及前次所奏卽有恐四面疲我兵練復曉以利害禍
福之語意已猶豫不及初念之堅今乃云酌撥兵練防禦明正要

隘儻再肆滋擾一面相機辦理等語更屬非是試思僧格桑去歲甫受約束曾未逾年復攻圍沃克什且又侵及明正土司卽宜興師問罪以儆兇頑尙何所用其遲疑緩待必欲縱令鴟張坐貽養癰之患耶阿爾泰久任封疆不應不曉事若此至金川形勢險隘非小金川可比原不便輕率用兵且果能將小金川迅速嚴辦示之炯戒則索諾木自當聞風知畏不待勦而自退何至慮及一併用兵需兵多而糜費重阿爾泰豈全未審度事理重輕惟急於完事卸責乎阿爾泰著傳旨嚴行申飭至董天弼自往西路以來爲時已久於何時進兵及僧格桑曾否擒獲至今未據奏及亦諭令迅速奏聞仍與阿爾泰聲息時通協力妥辦○丙辰命截留漕糧五十萬石於天津北倉備賑○丁巳 上奉 皇太后啓鑒○命文綬赴哈密等處購備賞給土爾扈特降人性畜衣服○庚申諭

去年潮河暴漲衝及古北口邊牆致有傾頽因特發帑金派和爾精額會同王進泰鳩工庀役重加修築以復舊觀本年七月初雨後河漲復盛新修之牆仍然頽塌茲驛路經臨親行閱視見城垣圯處適當來水之衝盪擊在所不免原不當與水爭地況自古建立邊牆本爲守險控遠而設若我朝德威遐訖口外耕耰相望久爲內地編氓卽蒙古諸番亦無不隸我臣僕並非可僅云中外一家又何藉此重門之禦而必與水爭地請事修復仍被水衝乎所有經水衝損之牆竟無庸復行補築止須就其形勢於外層稍加盤葺因嚙址重置礮臺俾存規制而示觀瞻其缺處聽水暢流不致陵擊爲患轉爲經久無弊之策但此項工程歲役未及逾年何以一遇水衝卽復隕圯究係施工不能堅實所致若按保固成例理應酌賠但念工料繁多非伊等力所能辦著加恩免其賠還而

承辦草率之咎難以輕貸和爾精額王進泰俱著交部嚴加議處
○辛酉諭軍機大臣等前因土爾扈特等投誠人眾急需養贍曾
諭令文綬前赴巴里坤開展哈密吐魯番一帶購辦牛羊等項解
往接濟昨據舒赫德奏土爾扈特等人眾時屆冬寒須給與防寒
衣服請由內地購辦皮衣二三萬件發往等語朕已諭令文綬卽
照數購辦運往但思所需皮襖爲數甚多一時恐未如數購足此
等新附人眾見在衣不蔽體止取急資禦寒卽棉襖等類亦無不
可因憶文綬前奏到估變哈密廳協庫貯物件單內開棉襖二千
五百件氈衣八百餘件此等殘舊衣服卽變價所值無多若就近
解交伊犁爲伊等禦冬之具亦屬一舉兩得著傳諭文綬卽行揀
湊運往但湊用恐亦不能足數文綬務須酌量情形迅速通融籌
辦如數購足統於九月底解到伊犁俾得及時撥給方爲妥協此

諭著六百里加緊發往文綬接到後速卽上緊趕辦毋得刻遲仍將作何辦理何時運往之處迅卽由驛馳奏並將此諭令舒赫德知之尋文綬奏前發到舒赫德奏摺稱土爾扈特窮困或衣服破爛或靴鞋俱無其幼孩有無一絲寸縷者臣查哈密廳協二庫估變各物有棉襖氈衣號褂棉褂帽鞋棉襪等項共六千有奇並皮布簾等項請挑取可用者充實得旨甚好如此留心朕得一好大

臣何樂如之雖細事誠可嘉也但期此後諸事如此留心則益善耳又奏甘省向產皮張惟是六七兩月已販往各處本地甚少見飭各府州縣將衣料儘先購買如有不敷卽購買皮張覓工趕做俟辦有二三百件卽陸續運往再土爾扈特挈眷來歸其婦女均知縫紉儻皮衣不敷卽將皮張搭運並豫備絨綫散給伊等自製又查哈密庫內有皮布棉簾棚簾布簾等項巴里坤有夾布口袋

二萬餘條俱可改製帳房衣服容臣挑取運至甘省民人無皮衣者俱以氊衣禦冬而價較皮衣稍省應購數千件搭散得旨嘉獎
○癸亥 上奉 皇太后駐蹕避暑山莊○諭軍機大臣等阿爾

泰見在辦理小金川一事胸中竟無定見惟圖急於遷就了事已節經傳諭飭示小金川土舍僧格桑去歲與沃克什搆釁經阿爾泰曉諭解圍乃甫受約束不及一年近因金川土司索諾木與革布什咱相仇輒復效尤滋事且敢侵及明正土司其罪實無可追阿爾泰初議懾以兵威尙爲有識小金川之地非若金川險隘我兵向曾經行無難深入董天弼旣往西路進兵阿爾泰亦卽當會兵兩路夾擊出其不意執彼兇渠或以力擒或以計誘聲其罪而治之然後另立土司撫定其地則金川聞而知畏自當不待征剿斂迹歸巢方合控制機要乃阿爾泰遷延不決一味畏首畏尾殊

昧緩急輕重之宜今此事辦理已覺濡滯若再因循時日致兩酋
潛相聯絡滋蔓難圖於邊夷要務甚有關繫阿爾泰久厯封疆樸
誠任事凡察吏安民講求地方實政乃所優爲伊由部員出身未
嫻軍旅且齒邁軀肥於驅馳行陣殊非所宜卽令其獨任運籌而
意涉游移亦恐於事未必有濟因思德福已調任川督邊務乃伊
分所應爲况伊曾在阿克蘇等處辦事於調度軍務亦所諳悉而
阿爾泰係多年總督且已授爲大學士其實亦無可談兩人協力
妥商自能和衷集事斷不致彼此稍存畛域前諭德福於彰寶回
滇後卽來京陛見再赴新任原不過欲面詢滇省軍營應辦諸務
今此事關繫緊要其滇省之事德福如有應面陳者不妨具摺奏
聞著將此旨由六百里加緊發往德福此時想已自永昌起身途
中接奉此旨卽由該處取道四川迅速馳驛前往會晤阿爾泰公

同商辦務期妥善所有阿爾泰節次奏摺及朕傳諭阿爾泰之旨並鈔寄德福閱看至該處帶兵亦須練習之人但此事原係該督等辦理本省邊情不值由京派人前往已諭令鐵保帶領成都滿洲兵二百名馳赴該督等見駐處所以備領兵進剿再於通省滿洲總兵副將內揀選得力之員調赴該處著將此並諭阿爾泰董天弼知之德福接奉此旨於何日起程於何路前往先行具摺覆奏到川後仍將商辦情形迅速由驛奏聞尋奏臣遵旨於八月初四日轉回貴陽取道畢節由四川永甯瀘州一路飛馳阿爾泰駐紮之所和衷商辦務期安速仰慰 聖懷得旨嘉獎

八月庚午諭據高晉奏江南河道總督李宏因感患暑熱病故等語李宏自簡任總河以來辦理一切修防事宜頗爲妥協今年督辦搶築各工不辭勞瘁尤屬奮勉出力今聞溘逝深爲軫惜所有

應得卹典著該部覈例具奏尋予祭葬○諭吳嗣爵著調補江南河道總督所遺河東河道總督員缺著姚立德署理其河東河務並著何烱兼管○辛未以國泰爲山東按察使由郎中遷○乙亥阿爾泰奏近接提臣來札小金川已各處添設礮卡而官兵尙未到齊故先行譚諭曉以利害第小金川占據沃克什距巢穴甚遠勢須先擊退攻圍沃克什之兵然後擣其巢穴兵力應否酌增見與提臣商辦儻因調兵已多茶息銀兩不敷請動庫項其金革一案據遊擊宋元俊稟稱索諾木差人懇伊親臨其地臣卽令其前往飭諭撤兵退地得旨諸凡不妥恐汝不能辦此事早有旨命德福去幫汝若再不知和衷更可鄙矣戒之又批彼旣修卡據守曉以利害反令其知爾等欲將就了事之意矣如此不曉機宜奈何奈何又批汝等已遲延時日矣尙云稍需乎看此光景卽應增兵更何

待商之提督可笑○己卯四川提督董天弼奏臣於七月初二日抵瓦寺之卧龍關與小金川見占之巴朗拉距八十餘里賊人已砌礮修卡而沃克什之達木巴宗木耳宗日隆宗在巴朗拉西南是小金川已將官兵進剿之路隔絕臣約計達木巴宗糧貯足供數月無虞內潰先諭小金川曉以禍福利害如仍執迷俟官兵到齊卽行掩襲得旨總不成事體已有旨了諭軍機大臣等前因董天弼自打箭爐西路酌辦進兵業經五十餘日總未見奏及作何辦理節經傳旨申飭今閱該提督所奏總不成事體已於摺內批飭矣董天弼旣往瓦寺一路酌辦用兵自應乘其不備迅速進剿擒獲渠魁乃七月初二日已抵卧龍關至初六日尙爾茫無措置豈兵貴神速之道且董天弼身爲四川提督川省兵丁皆其所轄何難飛檄催趲迅速掩擊使彼猝不及防乃一味遷延坐待轉以

官兵未能到齊爲詞意欲推諉至僧格桑甫經遵受約束退回復敢圍攻沃克什實屬頑梗不法該提督前奏明知其不可以口舌化導必須懾以兵威況小金川已築礮拒守仍復譚諭曉以利害徒爲番夷輕視知若輩之毫無能爲於事安能有濟董天弼如此畏葸不堪何以膺專閫重寄豈竟面視邊務尙思遷就了事耶至所稱糧食足供數月尙無內潰之虞更不成語董天弼此行豈不過虛應故事竟思玩日老師優游坐食乎至董天弼與阿爾泰分駐辦理軍務該處一切情形自應隨時專摺速奏乃兩月以來僅一陳奏尙付差弁緩程齎遞而摺內復云相距路遠不及與督臣聯銜實屬可鄙可笑提督有奏事之責况係進兵之時何至畏懼總督如此真是全然不曉事體恐伊福薄不足以副委任董天弼著再傳旨嚴行申飭嗣後宜奮勉痛改毋貽重戾○壬午董天弼

奏賊人所占之巴朗拉山勢險峻難以仰攻惟距卧龍關四十餘里山神溝小路可以繞出巴朗拉之後臣先行偵探得圍困達木巴宗之賊番約有二千沃克什尙能堅守若由山神溝前往五日可到茲定於八月初七日進發其巴朗拉山下鄧仍地方令總兵福昌駐紮相機攻勦得旨仍屬遲緩旣得捷徑觀汝如何奮勇成績耳○癸未阿爾泰奏明正地方見集漢土兵練五千五百餘名除防守要隘兵二千名外尙有三千數百名似可敷用但小金川與明正交界隔一大河須用皮船過渡而皮船僅容一二人且小金川沿河設備是以趕造木船並設法遮護賊人槍礮使兵練得以多渡至僧格桑與索諾木本係同族又兼姻親地界毗連實不能斷其來往再小金川近復於木坪連界地方添設碉卡臣見撥兵防禦得旨總不中機宜不見奮勇如何如何○甲申諭軍機大

臣等據阿爾泰奏籌辦小金川一摺總不中機宜不見奮勇已於摺內批飭矣看來阿爾泰辦此一事始終茫無定見前奏令董天弼前往西路相機會辦所云示以兵威不過空言塞責其實並未豫計進兵之事及見朕屢次飭諭方知事難中止而所辦又已濡遲故前以官兵未齊爲詞今復以隔河艱渡爲解可見其始則惟圖遷就完事意涉游移今則氣餒心忙畏難自阻尙安望其能奮勵集事乎如所稱小金川與明正交界隔有大河因皮船過渡不能多載一面趕造木船等語足見其不合機要阿爾泰駐彼已將三月果如有必須舟楫形勢卽當上緊製備船筏剋期濟師何至今始須成造藉爲文飾玩時之計且復慮及賊人槍礮設法護船作此畏蕙無能之態耶至小金川敢於設礮豫防顯有抗拒官兵之意則其與金川早相聯絡可知若復日久因循益滋養癰之患

小金川地界雖與金川毗連其路徑並非若金川險隘昔年官兵進剿取道安行未聞小阻何至今日忽變爲險熾難於深入卽金川之不宜輕進亦因刮耳崖等處不能並騎長驅非其番夷果皆驍悍難制若彼輕離巢穴至小金川之地相濟爲惡抗我顏行則彼已自失其險何妨一鼓而併殲之豈不更爲直捷乃惟以不能斷其往來藉口豈因僧格桑有金川黨助竟欲置之不問乎且小金川設礮之處西路在瓦寺界南路在木坪界並非處處皆有礮卡拒防我兵何難避越番礮別尋進路卽如董天弼在卧龍關訪有山神溝閒道以圖密進雖未知其成績若何然可見賊巢之原非無閒可入阿爾泰在南路何未聞購覓捷徑率眾進攻爲守株坐待之見豈其智並出董天弼下乎卽或因伊等虛張聲勢曠日緩期致狡酋得以豫爲之備一時未可猝議進剿獨不當多調兵

練爲圍困計竟爾束手無策其番夷全賴耕種爲食必不能終年
防守自棄農功更不能築礮護田廣爲守望若乘其懈而急爲襲
擊或就其地而頻與蹂躪使之應接不暇久將自潰乃阿爾泰一
味畏首畏尾於近計遠籌漫無措置縱彼未嫺軍旅豈平時實心
任事之忱惴至此亦復毫忘而竟甘於苟安玩視邊務若此所爲
公忠體國之道安在著再傳旨嚴行申飭昨德福奏至已於八月
初四日自貴州由永甯瀘州一路馳驛赴川計此時可至阿爾泰
駐兵之地阿爾泰務須自勵夙誠與彼和衷妥辦速期奏績若再
稍存畛域之見計圖推諉則是自取罪戾矣將此並諭德福知之
該處見在進兵情形及與董天弼如何知會兩面夾攻之處仍著
速行由驛覆奏○命侍郎副都統並提鎮學政藩臬等無庸進獻
稱祝○乙酉諭軍機大臣等據李侍堯奏暹羅丕雅新將擒獲花

肚番頭目男婦差人解送來粵見在委員押解進京查訊等語邏
羅送到之花肚番男婦是否卽係緬匪自應解京審訊其眞僞無
難立辨至丕雅新當邏羅殘破乘機竊掠妄冀敕封曾令軍機大
臣代李侍堯擬寫檄棄正詞斥諭今復藉奉檄擒獲花肚番逆匪
爲名冀邀賜懋朝貢自不應允其所請但去歲遊擊蔡漢往諭河
仙鎮目截擒緬酋時蔡漢聽信莫士麟之言曾行文丕雅新一體
擒獻今丕雅新旣以遵奉憲令爲詞尙知敬奉天朝大臣亦不必
槩付不答絕之太甚自應卽以該督之意酌量賞給段匹稍示羈
縻該督仍給以檄文回覆丕雅新諭以爾所送花肚番男婦是否
實係緬匪其事虛實本部堂難以憑信不便率行陳奏但爾旣已
送到姑留內地收管另爲查辦因爾奉令惟謹遣人航海遠來本
部堂特給爾段匹付來人齎回以示獎勵至爾所稱乞恩賜懋許

照舊例朝貢之處本部堂更不必代爲轉奏已於前檄明白示覆矣如此宣諭於駕馭外夷自爲得體可將此傳諭李侍堯知之○丙戌禮部議覆朝鮮國王李昉奏國內流傳康熙丙子年間朱璘所撰明季輯略本於明人陳建皇明通紀載其先世之事因譌襲謬誣妄含冤請將二書中有關小邦之語並行削去查朱璘輯略於乾隆二十二年浙江巡撫楊廷璋奏請銷毀其陳建通紀見徧訪京城書肆並無售者是二書在中國久已不行無事改削該國王所稱誣竄其國祖康獻王旦世系及其四世祖莊穆王侖事蹟二條今恭閱 欽定明史朝鮮列傳載其始祖世系及國人廢璋立侖之處考據已極詳明乾隆三年我 皇上允該國王所請刷印頒給該國自應欽遵刊布使其子孫臣庶知所信從若陳建通紀朱璘輯略二書應令該國王於其國中自行查禁焚銷以杜疑

竇從之○戊子諭伍勒穆集見在身軀不能轉動所有理藩院侍郎員缺著福德補授其鑲藍旗蒙古副都統員缺著福康安補授伍勒穆集雖屬艱於轉動似尙可以坐辦事務著加恩賞給侍郎全俸仍管唐古特學及經呪館事務如有應行繙譯事件仍令繙譯○己丑諭據伊勒圖等奏稱將軍成袞扎布病故成袞扎布自授定邊左副將軍以來著有勞績宣力多年昨聞其病發曾降旨令伊子德勒克多爾濟額駙拉旺多爾濟帶同御醫馳驛前往診視今聞薨逝朕心深爲悼惜著加恩賞銀一千兩以資冥福卽由烏里雅蘇台庫內支給仍派乾清門侍衛一員前往奠醑其應如何加恩致祭之處著該部察例具奏又諭定邊左副將軍員缺著加恩令車布登扎布補授額駙拉旺多爾濟旣係世子所有扎薩克和碩親王卽令拉旺多爾濟承襲其盟長事務卽著車布登扎

布兼理車布登扎布所遺喀爾喀副將軍員缺著交理藩院開列
應放人員職名請旨○諭軍機處行走之署理藩院侍郎福德見
已補授侍郎著不必在軍機處行走○庚寅諭各省舉人歷科遞
積滋繁銓選向多壅滯朕心深切軫念曾爲籌計疏通之法於丙
戌會試後降旨分別揀選引見量其人才年力以知縣分發教職
注授並許借補丞簿等官令得及鋒自試越今六載俱經各督撫
陸續題咨補授所餘待缺者已屬無多廣登進以免積薪於寒峻
甚爲有益今歲恭逢 聖母皇太后八旬萬壽特開鄉會 恩科
俾歡洽彙征永爲例事其年臻耄耋耆業於今春榜後視其齒序
恩予職銜 壽字覃釐用徵士林嘉瑞而雲集觀光之眾亦當令
其同沾 慶澤益廣 慈禧著於今歲春闈後仍照丙戌年之例
將應試舉人分別等第揀選引見錄用俾得乘時筮仕以示振興

並彰錫類作人之至意所有辦理事宜該部臨期再行奏聞請旨
將此通諭知之○諭軍機大臣等前據高晉奏懇於防汛武場事
竣後赴京恭祝 萬壽未允所請今因永定河連年漲溢瀕河州
縣低窪地畝節次被淹動需賑恤而漫口之處今秋復較去夏倍
寬此蓋由河身淤高隄岸卑薄所致勢不可不設法修治以杜後
患原擬派裘曰修會同楊廷璋勘辦但楊廷璋於河務本未諳悉
且已年逾八十精力亦漸不如前恐不能籌度盡善卽裘曰修雖
疊經委勘水利河工尙係學習辦理所見未必悉中窾要若僅交
彼二人經理尙未能輕重合宜朕十月初回鑾後卽有應辦 慶
典等事又不能親莅相度指授深爲躊躇因思高晉於河防一切
機宜最爲明練平素又實心任事確有定識從不肯稍涉沽名亦
不僅爲節省錢糧起見辦此一事自無出其右者且如裘曰修查

勘工程或估至二十萬兩朕亦不能信其必不虛糜若高晉經辦之事卽多至二百萬兩朕亦可信其斷無浮濫蓋裘曰修尙不免高興好名亦不及高晉之老成誠慤足資倚任也見在南河防汛之事已竣吳嗣爵想亦可赴新任著傳諭高晉於奉到此旨後卽將總督印務交薩載暫行兼署其武闡之事亦卽令薩載辦理至河工應辦來年工料諸事卽告之吳嗣爵令其查覈吳嗣爵爲人尙屬細心自可不至貽誤高晉交代後卽起身前赴行在面請訓示卽往永定河一帶會同裘曰修楊廷璋逐一履勘將應行繕治事宜詳悉通盤籌畫繪圖貼說具奏其北運河亦連年漫溢並宜籌辦減洩豫防之法亦令高晉等就便一併查辦高晉於查勘河務葺事正屆 聖母大慶之時卽可遂其來朝拜舞之忱而在廷見無滿洲大學士高晉來此領袖班聯恭與 慶典於禮儀亦爲

相合高晉於慶祝後仍可回兩江總督之任河工經彼勘計則按其所定章程臨時再派大臣董辦自可臻妥善矣將此一併傳諭知之○壬辰欽差侍郎德成直隸總督楊廷璋奏永定河漫口於八月十六日合龍並新壩加高培厚統於十七日竣工得旨覽○癸巳 上自避暑山莊巡幸木蘭行圍○甲午諭軍機大臣等阿爾泰奏辦理小金川情形一摺已於摺內批示據稱遊擊宋元俊業已前往面諭索諾木該土舍禮貌雖極恭順而以弟兄五人商明再覆爲辭顯係推阻之意看來索諾木之頑劣不卽遵教總因僧格桑甫受約束旋與沃克什構釁又復侵及明正土司尙未加以懲創遂致無所忌憚今惟有將小金川上緊攻勦擒獲兇渠削平其地而分屬之則金川自必聞風畏懼不敢復行梗化辦理之法無有踰於此者昨據董天弼奏已於八月初七日由開道進攻

此時當已擣其巢穴見在阿爾泰所奏亦稱約計十四五日即可進兵果能剋期夾擊僧格桑自必首尾不能相顧斷不敢仍前抗拒如官兵到彼僧格桑卽能就擒其局自易完結設或僧格桑勢窘力感竄入金川亦不值引兵復進金川勒取止須查其家屬及黨惡之人收捕分別查辦仍遵前旨將小金川地方分給附近之沃克什雜谷明正等各土司管理並酌留官兵駐守彈壓一面傳諭索諾木令將僧格桑擒獻其事亦卽可了阿爾泰便可來京辦事德福亦可回至省城惟暫留董天弼在彼統兵鎮撫俟日後局勢大定董天弼再行回署仍派明幹將領在小金川與金川扼要地界駐兵並不妨守禦一二年番酋等自不能經久受困也至前諭令索諾木抄掠小金川彼時因未知兩土酋之已經聯絡今就該處情形而論則兩酋久相比附狼狽爲奸索諾木豈復肯與小

金川自相殘賊乃阿爾泰仍以駕馭索諾木抄掠爲言可謂拘泥而不達事體見在專辦小金川不必復向金川告諭若僧格桑或向金川逃匿則於傳檄索取時並諭以僧格桑自作不靖竄入爾界今官兵已平定其地散給附近各土司分管仍留兵駐守是僧格桑永遠不能歸巢爾今留彼養贍其眾何時能了是爾無端爲彼貽累在爾亦殊失計爾索諾木之父卽係久經歸化之人爾若能將僧格桑擒獻自當將爾獎賞番蠻等本屬見小之人爲之明白開導其勢必不能久合如此方得要領至遊擊宋元俊前因其不卽向金川曉諭懦怯無能諭令阿爾泰參奏今阿爾泰以宋元俊於邊地情形頗熟派令統兵攻剿該遊擊如能奮勇自效不但必効究並當論功錄用若專務緣營欺罔惡習仍不努力向前卽一併重治其罪可卽飭令該遊擊遵奉臆勉將此由六百里加

緊傳諭阿爾泰德福蓋天弼知之仍令將各該處進兵情形迅速具奏○丙申四川總督德福奏緬匪狡詐與苗種相仿然無妄念止圖報復不敢侵擾邊界從前起釁俱係土司與緬屬夷人爭鬧並非憎駁輕犯邊境且關外崎嶇林箐兼有瘴癘我兵不能久駐請暫停襲擊之舉於冬日內令哈國興帶兵關外駐紮差傳諾爾塔前見賊酋曉以利害伊若懼禍表貢其事卽已善全備照常戢頑仍嚴守邊關不通交易數月後出其不意可操必勝得旨看汝如此識見朕又愁金川亦不能奮勇辦理矣如何如何朕不能識人不能化導汝等大臣惟自咎自愧而已亦無他諭矣○丁酉諭德福至四川所陳緬賊各情形一摺識見甚爲乖謬緬地水土惡劣我兵難於深入自不宜復議大舉墮其術中而賊匪反悔頑梗亦豈竟置之不問因議於秋冬之間派兵襲擊出其不意並非欲

直擣阿瓦亦非欲竟取猛密不過躡彼疆境乘勢誅掠焚燒令賊
匪知我並未歇手庶幾稍識畏懼送還內地之人以完此局就事
而論實有不可不如此辦理者何至過於顧慮襲擊亦不可行耶
前諭德福到川卽接受總督印務辦理小金川軍務若執此懦怯
庸謬之見恐其於進剿事宜轉致貽誤所有四川總督印務仍著
阿爾泰兼管德福著卽來京候旨

九月戊戌朔諭據永德奏通省典商情願公捐銀兩恭祝 萬壽
擬卽將此項重建鐵佛寺並請敕賜嘉名等語殊屬非是已於摺
內批飭矣本年恭遇 聖母八旬萬壽朕躬率寰宇臣民臚歡掖
輦於京城敬陳 慶典衢歌巷舞懽忭同申至於各省官吏紳耆
屆期第須齊集公所拜舞呼 嵩以祝 慈禧而抒忱悃卽建壇
誦經亦不宜聽其輕有舉行若典商不過里巷逐利細民並非准

浙鹽商各有職銜世受國恩者可比鹽商等向有公捐之請朕尙不允行至此等微末經商卽其姓名亦不宜輕達今忽請捐貲從來無此情理承德若稍知事體當伊等具呈時卽應詳晰曉諭不准所請乃竟輕爲允納且爲籌建寺宇並令官爲伙助竣工以此等斷不可行之事轉若視爲盛舉沾沾入告豈伊身任巡撫竟以典商醵金建寺爲得意全不顧朝廷大體乎所有伊等已繳之銀俱著卽行發還承德識見卑鄙著交部嚴加議處○己亥諭軍機大臣等昨德福奏緬匪情形一摺識見鄙謬已傳旨嚴行申飭矣今細閱德福所奏名爲不必襲擊緬匪其心實因不肯辦理小金川起見觀其欲令哈國興往招諾爾塔之意隱以僧格桑與諾爾塔相類仍欲遣人招諭完事不過指東擊西冀售其詭譎之計耳德福如果確有所見籌畫出自良心則彼自今年三月接署雲貴

督篆以來距其七月間自永昌起程爲期已將半載何不於在任時及早敷陳直至入四川境方爲此奏若以爲事體重大必須面請則彼八月初甫至黔省途中雖兼程而行亦須俟朕行國事畢出哨後始得陛見已屆九月中旬即使朕允其所請迅速傳諭溫福計溫福接到時業已進兵襲擊德福豈不籌度及此其意不過以幸得總督實缺急圖將就完局撤退軍務安享封疆之樂而又不取明言故藉緬事以巧施其曲說此等伎倆豈能於朕前嘗試耶况前此諭令德福赴川時曾將阿爾泰等節次所奏辦理小金川事宜各摺鈔寄閱看德福豈不知僧格桑之滋擾鄰境土司屢經阿爾泰等曉諭受約歸巢曾未數月復敢與金川狼狽爲奸乘閒攻圍沃克什及明正土司豈可仍以口舌化導若不急事剿擒使番蠻稍知懲儆朝廷威令安在且何以綏靖邊方德福何尙狃

其懦怯之見仍萌在阿克蘇時之故智耶朕前以德福近日頗似實心任事或可助阿爾泰所不及因令其星速赴川協同辦理昨閱阿爾泰覆奏之摺似能體朕節次諭旨自知改悔自可望其奮勉成事若留德福在彼逞其乖妄之見必致掣肘貽誤是以令其來京候旨但德福前日所奏敢於取巧不但深負委任其居心實不可問著傳諭德福令其卽行明白回奏此時董天弼已由閒道進攻破其大碉阿爾泰自亦派兵夾擊若能擒獲僧格桑撫定其地或逆酋畏懼逃匿將小金川分隸管轄駐兵鎮守以結其局固善否則俟溫福襲擊緬匪事竣於開春統率八旗勁旅馳赴川省奮力進剿自能剋日成功將此於阿爾泰溫福奏事之便一併諭令知之○庚子阿爾泰奏據宋元俊稟稱查有附近章谷之巴旺及布拉克底土司與小金川所占明正之納頂等境毗連若由此

進兵可將所占明正地方全復已密飭該土司遵辦嗣據稟稱兩處願以兵一千五百引路見在調集是以未卽渡河攻勦報聞○辛丑諭軍機大臣等據董天弼奏由山神溝山路進兵至德爾密地方連奪石卡並攻克大礮一座勦殺番眾數十人餘俱越嶺而逸我兵已扼險要因該處雨雪交加各兵俱係裹帶乾糧不舉煙火者已有八日未免稍形疲乏見俟分兵畢旺拉一路探有消息兩路會合進攻並照會鎮臣福昌守禦山神溝後路等語董天弼辦理此事尙屬奮勉已於摺內批示矣該提督雖係閒道往攻裹糧而行但豈無繼運兵餉俾資接濟亦豈無續進之兵以爲聲援阿爾泰初聞董天弼進兵之信曾否籌辦及此迨探知董天弼攻礮之後曾否速爲策應著傳諭阿爾泰卽行據實覆奏至巴朗拉一面爲攻小金川大路董天弼原議令總兵福昌進勦以挫其鋒

彼由小路密進兩路夾擊今董天弼進兵後已攻克卡礫福昌自八月初七日分兵以來至今已將一月曾否進兵往攻及巴朗拉一路有無賊匪拒守該鎮會否與之接仗所辦情形若何並未據奏報一字總兵本有奏事之責況當統兵分剿尤應隨時入告豈宜緘默若此並著傳諭福昌令其迅速詳晰覆奏此旨著由六百里加緊發往○癸卯命理藩院侍郎慶桂軍機處行走○乙巳土爾扈特台吉渥巴錫等入覲 上御行幄受朝賞給頂帶冠服有差 御製土爾扈特全部歸順記曰始逆命而終徠服謂之歸降不加征而自臣屬謂之歸順若今之土爾扈特攜全部捨異域投誠嚮化跋涉萬里而來是歸順非歸降也西域既定興屯種於伊犁薄賦稅於回部若哈薩克若布魯特俾爲外圉而羈縻之若安集延若巴達克山益稱遠徼而縶置之知足不辱知止不殆朕意

亦如是而已矣豈其盡天所覆至於海隅必欲悉主悉臣爲我僕
屬哉而茲土爾扈特歸順則實天與人歸有不期然而然者故不
可以不記土爾扈特者準噶爾四衛拉特之一其詳已見於準噶
爾全部紀略之文溯厥始率亦荒略弗可考後因其汗阿玉奇與
策妄不睦竄歸俄羅斯居之額濟勒之地康熙年間我皇祖聖
祖仁皇帝嘗欲悉其要領令侍讀圖麗琛等假道俄羅斯以往而
俄羅斯故爲紆繞其程凡行三年又數月始反命今之汗渥巴錫
者卽阿玉奇之曾孫也以俄羅斯征調師旅不息近且徵其子入
質而俄羅斯又屬別教非黃教故與合族台吉密謀挈全部投中
國興黃教之地以息肩焉自去歲十一月啓行由額濟勒歷哈薩
克繞巴勒喀什諾爾戈壁於今歲六月杪始至伊犁之沙喇伯勒
界凡八閱月歷萬有餘里先是朕聞有土爾扈特來歸之信慮伊

羣將軍伊勒圖一人不能經理得宜時舒赫德以參贊居烏什辦
回部事因命就近前往而畏事者乃以新來中有舍楞其人曾以
計誘害我副都統唐喀祿因以竄投俄羅斯者恐其有詭計議論
沸起古云受降如受敵朕亦不能不爲之少惑而略爲備焉然熱
計舍楞一人豈能聳動渥巴錫等全部且俄羅斯亦大國也彼既
背棄而來又擾我大國邊界進退無據彼將焉往是則歸順之事
十之九詭計之伏十之一耳既而果然而舒赫德至伊犁一切安
汛設偵籌儲密備之事無不悉妥故新投之人一至如歸且掄其
應入覲者由驛而來朕既命隨圍觀獵且於山莊宴賚如杜爾伯
特車凌等之例焉夫此山莊乃我皇祖昔所建以柔遠人之地
而宴賚車凌等之後遂平定西域茲不數年閒又於無意中不因
招致而有土爾扈特全部歸順之事自斯凡屬蒙古之族無不爲

我大清國之臣 神御咫尺有不以操先券閱後成愜志而愉快者乎予小子所以仰答 祖恩益懍 天寵惴惴焉惟恐意或滿而力或弛念茲在茲遑敢自詡爲誠所感與德所致哉或又以爲不宜受俄羅斯叛臣虞啓邊釁夫舍楞卽我之叛臣歸俄羅斯者何嘗不一再索取而俄羅斯訖未與我也今旣來歸卽以此語折俄羅斯彼亦將無辭以對且數萬乏食之人旣至近界驅之使去彼不劫掠畜牧將何以生雖有堅壁清野之說不知伊犁甫新築城而諸邑人皆賴耕牧爲活是壁亦不易堅而野亦不可清也夫明知人以向化而來而我以畏事而止且反致寇甚無謂也其眾涉遠歷久力甚疲矣視其之死而惜費弗救仁人君子所不忍爲況體天御世之大君乎發帑出畜力爲優恤則已命司事之臣茲不贅記記事之緣起如右 御製優恤土爾扈特部眾記曰歸降

歸順之不同旣明則歸順歸降之甲乙可定蓋戰而勝人不如不戰而勝人之爲盡美也降而來歸不如順而來歸之爲盡善也然則歸順者較歸降者之宜優恤不亦宜乎土爾扈特歸順原委已見前記茲記所以優恤之者方其渡額濟勒而來也戶凡三萬三千有奇口十六萬九千有奇其至伊犁者僅以半計夫以遠人向化攜孥挈屬而來其意甚誠而其阽危求息狀亦甚憊旣撫而納之苟弗爲之贍其生猶弗納也贍之而弗爲之計長久猶弗贍也故自聞其來及其始至以迨於今惟此七萬餘眾凍餒疔瘡之形時懸於目而惻於心凡宵旰所究圖郵函所咨訪無暇無輟乃得悉其大要於是爲之口給以食人授之衣分地安居使就米穀而資耕牧則以屬之伊犁將軍舒赫德出我牧羣之孳息驅往供饋則以屬之張家口都統常青發帑運茶市羊及裘則以屬之陝甘

總督吳達善而嘉峪關外董視經理則以屬之西安巡撫文綬惟時諸臣以次馳牘入告於伊犁塔爾巴哈台之察哈爾厄魯特凡市得馬牛羊九萬五千五百其自達里剛愛商都達布遜牧羣運往者又十有四萬而哈密闢展所市之三萬不與焉撥官茶二萬餘封出屯庾米麥四萬一千餘石而初至伊犁賑贍之茶米不與焉甘肅邊內外暨回部諸城購羊裘五萬一千餘襲布六萬一千餘匹棉五萬九千餘斤氈廬四百餘具而給庫貯之氈棉衣什布幅不與焉計費儲用帑銀二十萬兩而賞貸路費及宴次資予不與焉其台吉渥巴錫等之入覲者乘傳給餼而來至則錫封爵備恩禮其往也復慮其身之生不宜內地氣候則命由邊外各臺歷巴里坤以行而迎及送並遣大臣侍衛等護視之用以柔懷遠人俾毋致失所或有以爲優恤太甚者蓋意出於鄙吝未習聞國家

成憲毋惑乎其見之隘也昔我 皇祖聖祖仁皇帝時喀爾喀
土謝圖汗等爲厄魯特所殘破率全部十萬眾來歸 皇祖矜其
窮阨 命尙書阿喇尼等往撫之發歸化城張家獨石二口倉儲
以賑其乏且足其食又 敕內大臣費揚古明珠等齎白金茶布
以給其用採買牲畜以資其生遂皆安居得所循法度樂休養訖
今八十餘年畜牧日以蕃生殖日以盛樂樂利殷阜十倍於初
其汗王台吉等世延爵祿恪守藩衛一如內扎薩克之效臣僕長
子孫莫不感戴 聖祖德澤及人之深得以長享昇平之福也朕
惟體 皇祖之心爲心法 皇祖之事爲事惟茲土爾扈特之來
其窮厄殆無異曩時之喀爾喀故所以爲之籌畫無弗詳闕惠無
少靳優而恤之且計長久庸詎知謀之勞而費之鉅乎冀茲土爾
扈特之眾亦能如喀爾喀之安居循法勤畜牧務生殖勿替厥志

則其世延爵祿長享昇平之福又何以異於今之喀爾喀哉用是
臚舉大凡勒石熱河及伊犁俾土爾扈特汗王部眾咸識朕意且
以詔自今以往我諸臣之董其事者御製土爾扈特部紀略曰
事不再三精覈率據耳食以爲實君子弗爲也言不求於至是已
覺其失護己短而莫之改易君子弗爲也必知斯二者然後可以
秉史筆以記千載之公是公非余之爲土爾扈特部之紀略亦豈
是而已土爾扈特之初來也蓋嘗詠之詩載之記皆以爲始自阿
玉奇汗溯而上之荒略不可考此亦述向之所聞者而書之而不
知其更有所祖非始自阿玉奇茲以其麋至乃得一一詳徵其實
爲之重記何必隱約弗明以諱吾前言之未精覈哉阿玉奇之父
曰棚楚克其祖曰書庫爾岱青其曾祖曰和鄂爾勒克其高祖曰
卓立甘鄂爾勒克其高祖之父則曰貝果鄂爾勒克自貝果鄂爾

勒克溯而上之實遠不可徵其入俄羅斯也則自阿玉奇之曾祖和鄂爾勒克於策妄之祖巴圖魯渾台吉時其時四衛拉特各自爲汗無所統屬又不相和睦和鄂爾勒克因率其子書庫爾岱青等至俄羅斯之額濟勒地其時阿玉奇尙在襁褓因留巴圖魯渾台吉處後書庫爾岱青往西藏而回向渾台吉索阿玉奇歸俄羅斯巴圖魯渾台吉爲阿玉奇之外祖以時代計之適相當而阿玉奇汗時其子散扎布台吉率所屬一萬五千餘戶往投策妄策妄盡留其屬而逐散扎布歸額濟勒則向記所云阿玉奇策妄不睦亦未爲大誤也自貝果鄂爾勒克至和鄂爾勒克皆單傳和鄂爾勒克有子六人一卽書庫爾岱青餘三無子其二皆有子孫式微無足傳書庫爾岱青子四二絕嗣其一曰那木策楞四傳而至巴木巴爾今封郡王其一卽棚楚克四傳而至渥巴錫今封汗棚楚

克之子阿玉奇有子八人其六皆無子嗣其一曰衮扎布有子嗣
今之封親王策伯克多爾濟者其曾孫也衮扎布乃渥巴錫之祖
沙克都爾扎布之親弟故其子孫爲渥巴錫近族與沙克都爾扎
布子孫皆隨渥巴錫而來其戶口之數已見前記茲惟記其始祖
所自出並證前之失精覈而未實者至其重黃教置鄂拓克宰桑
之類率同準噶爾但具體而微蓋準噶爾之紀略紀其全部之盛
衰而茲土爾扈特之紀略則紀其世系之詳悉云爾○丙午賜土
爾扈特台吉渥巴錫等鞍馬纓轡令隨圍與觀○丁未諭額駙色
布騰巴勒珠爾奏帶領入覲之士爾扈特台吉等沿途經過地方
文武各官全然不以爲事以至多有貽誤並有總兵臬司道府等
大員前來認罪自稱奴才免冠叩首等語土爾扈特台吉係新來
投誠人眾前來入覲所有經過地方官員理宜豫備整齊使知天

朝體制業經朕特降諭旨令該省督撫妥協辦理乃各省官員尙敢不以爲事以至諸多貽誤狃於惡習殊屬不堪自應嚴加議處然此尙屬事之所有至總兵阿明阿恆德按察使德文河北道明琦知府博爾敦身係滿洲且皆地方大員經理不善亦無顏面但何至向色布騰巴勒珠爾自稱奴才免冠叩首卑鄙至於此極若謂色布騰巴勒珠爾係額駙則見額駙從無叩首之例如謂伊係王爵則滿洲謁見宗室王等亦不可自稱奴才免冠叩首阿明阿等如此行事實屬卑污已極有玷國家官爵真大奇事非尋常過失可比阿明阿恆德德文明琦博爾敦俱著革職發往伊犁自備資斧效力贖罪向來出差人等如果騷擾驛站經地方官詳報該督撫據實奏聞朕必將騷擾驛站之人治罪仍將該地方官深爲嘉予今地方官全不以事爲事亦太不堪若不嚴加治罪何以力

挽積習著將額駙色布騰巴勒珠爾參奏之遲誤馬匹食物各官俱交部嚴加議處此事若非額駙色布騰巴勒珠爾據實具奏朕何由悉外省官員怠玩至於此極如此相仍將來更無底止額駙色布騰巴勒珠爾不避眾怨據實奏聞甚是且伊此次帶領土爾扈特台吉前來亦頗奮勉額駙色布騰巴勒珠爾著交部議敘並將此旨及原摺一併譯漢通諭中外知之○戊申諭軍機大臣等閱阿爾泰今日奏到之摺不意其糊塗無用若此已於摺內批飭阿爾泰身為滿洲大學士凡有關國家要務何一不當實心籌辦况係川省總督番夷之事尤其專責乃自五六月閒既奏稱督辦進兵至今四月餘尙安坐打箭鑪並未發一兵未移一步所謂督辦者安在豈以專理地方日行案件便爲盡總督之職而於邊情軍務皆置之不問乎其意不過以爲德福將到即可藉以息肩豫

存五日京兆之見無論德福近日行爲與彼同一無用卽使其果勝於彼而竟甘心退讓束手無策縱不自顧顏面獨不懷覆轍之戒乎阿爾泰旣與董天弼豫商分路進兵自當與之剋日同進乃旣已後期又惟派一遊擊宋元俊前往阿爾泰仍駐打箭鑪不動惟知敦體養安豈滿洲大臣所宜有卽其自問不能親履行陣或在後督催以勵將弁等勇往之氣於事庶爲有益若欲待德福會商阿爾泰卽先期進兵德福到彼亦無難循蹤趨赴何竟退縮不前豈不爲將領等所竊笑乎至董天弼由山神溝聞道密進於八月十三日打破德爾密大碉距阿爾泰此次拜摺時已將半月阿爾泰前奏曾據西路糧員稟報得碉之事自應卽速派兵續進策應並爲籌撥繼運兵糧以資接濟仍一面速行進兵夾擊以壯聲援使頑酋首尾不能相顧方爲合理乃竟視西路爲董天弼之事

與彼毫無關涉全然置之度外豈滿洲老大臣實心體國之道言之不勝憤懣阿爾泰著傳旨嚴行申飭仍將此旨由六百里加緊發往著阿爾泰速將該處如何進兵情形及董天弼近日消息如何阿爾泰作何探聽接應之處迅速覆奏又諭今日阿爾泰奏到一摺實屬糊塗無用見已降旨嚴行申飭頃復據董天弼奏所得碉卡復行失去畢旺拉一路亦爲小金川奪去見退兵堅守要口等語是賊兵竟敢抗拒我師甚爲可惡豈可不加申討輕爲歇手至董天弼所請交部治罪之處且可不必得失乃行兵之常董天弼前次進兵尙屬勇往而此時之退失皆由帶兵本少不敷調撥緣營積習又皆懦弱無能阿爾泰復不早爲籌撥以至於此且看其此後如何奮勉自效以定功罪若再不知努力則其獲譴更深矣但所稱賊兵乘霧雨迷漫之時於左右山梁峰屯蟻聚而至守

礪之瓦寺士兵輒行驚潰等語殊覺可笑賊既能乘霧來攻我兵豈不能乘霧迎勦是兵力之不堪大槩可知且瓦寺與小金川同係土司何以賊之士兵皆屬有用官之士兵卽屬無能此皆調度不善之故阿爾泰在川最久豈竟漫無見聞何以不詳慎精選聽以懦弱充數不能得力所辦何事著傳諭阿爾泰明白回奏至董天弼本係乘閒攻其不備今德爾密一帶既有賊兵屯拒自難仍由原路再進亦不必復與攻奪所失之礪萬一少有挫折更覺不成事體但我兵卽不能深入而守禦隘口不使賊匪外逸尙屬力所能爲自當派撥弁兵嚴爲堵截西路見有總兵福昌在巴朗拉駐守則山神溝畢旺拉兩處卽可交該鎮一併抵禦以緩賊勢董天弼在彼亦無可施展伊於番地情形稍爲諳練且曾經從征金川尙係熟手今阿爾泰坐守南路毫無主見見在無可協同辦理

之人董天弼著卽馳往阿爾泰軍營會商進剿或可得其伙助之
益惟是綠旗恒怯之兵實不足恃看來未必遽能集事設或調度
又不合宜致損威重更難完局第當圍困賊人要隘勿令輕出以
待厚集兵力擣穴擒渠以靖邊徼前曾諭令溫福俟襲擊緬匪事
畢於明春帶兵馳赴四川妥辦今思襲擊一事原不過蹂其近邊
悉力焚殺以振兵威並非圖直抵賊巢剋期必進者可比卽遲一
年再辦亦無不可且緬匪未嘗不豫備我進兵今復緩其掩襲虛
虛實實轉屬出其不意況旣欲用我八旗勁旅之力若令於襲擊
後再往四川長途奔走或不免於疲乏亦不可不從長籌畫卽就
目下情事而論緬匪之暫停襲擊操縱在我而小金川敢於負隅
逆命若不急爲翦除養成賊勢於事大有關係自當權其輕重以
期有濟溫福前奏原議於十月初進兵此時尚在永昌部署著傳

諭溫福於奉到此旨後卽帶軍營所有之滿洲兵星馳取道赴川奮力攻勦務擒賊酋僧格桑分隸其地使番蠻稍知畏懼其黔省綠營兵除派守邊隘外並精選勇銳者千餘名一併帶往若以見有黔兵距川較遠卽仍照溫福前奏奉旨後酌定應用兵數飛咨黔省於川省相近營鎮速行選派精兵卽令前往自覺更爲妥便其原派帶兵之人亦應酌留滇省防守照單內點出者溫福帶往餘俱留於永昌所有副將軍印信溫福卽帶往備用至參贊大臣伍岱於軍務頗爲練習亦著同溫福前往會商進勦阿桂留於滇省亦屬無益著溫福隨帶赴川差委效力至於滇省邊務惟有派兵緊守關隘加意巡邏並令帶兵侍衛等分派各處守禦設有緬匪潛至邊境卽奮勇掩擊殲戮使之喪膽此事著交長青海蘭察哈圖興辦理毋稍疏懈彭寶並宜實力稽察經理勿致貽誤若此

時緬酋或遣人至關投遞文信不論多寡俱行留住惟擇其中最無用者一人遣回並令傳諭緬酋如將所留內地之人全行送回方可寬宥否則斷不歇手亦不必寫回書所辦滇省軍務不過如此至阿爾泰等見在進兵若能乘閒得利固善否則莫如極力圍守以待溫福到川一舉集事川省綠營兵卽多爲調撥亦未必能得力並著派成都滿洲兵一千名迅赴軍營聽候溫福派用其各兵所需馬匹糧餉著交阿爾泰卽豫爲熟籌速備若稍有玩誤惟阿爾泰是問恐不能當其重戾也此旨著由六百里加緊分路發往董天弼摺並鈔寄溫福並諭彰寶長青海蘭察哈國興知之○以黃檢爲山西按察使由山東克○己酉諭戶部侍郎桂林著卽馳驛前往四川辦事其隨往之軍機處行走郎中汪承霈亦著一併馳驛○諭軍機大臣等阿爾泰辦理小金川一事全無主見

斷難望其有成昨已降旨詳切飭諭並令溫福卽帶兵馳往四川妥辦矣看來阿爾泰董天弼於土司之事惟圖遷就了局從前小金川與附近土司互相仇殺伊二人率自往勸諭而止已非一次阿爾泰等旣意存姑息習以爲常而番酋等亦視督提爲和事老人狎不知畏本非綏靖邊圉之計至僧格桑上年甫受約束旋卽抗違其情甚爲可惡尤不可不痛加懲創無如阿爾泰等狃於外省積習畏難苟安卽其初奏稱僧格桑不復可以口舌化導必當示以兵威貌似認真其實全無措置仍欲空言塞責及接奉朕屢次飭責之旨始行籌及遂至兵不敷派糧無繼供此董天弼一路之所以雖由閒道進攻得而復失也今小金川竟敢抗拒我兵尤不可以輕宥奈阿爾泰始終毫無成見於需兵若干作何調撥及何路可以進擊何路當爲堵截並未通盤籌畫不過東那西

掩敷衍目前若似此怠忽遷延必至養癰貽患至小金川形勢並
非若金川有險可憑難以深入第因玩誤日久頑酋得以豫爲準
備而阿爾泰等至今尙未得其要領雜湊懦怯之兵零星塘塞豈
能制勝自不可不厚集兵力督率大進以期擣穴擒渠是以令溫
福卽行馳往但溫福自滇赴川未能一時卽至而見在之局卽不
能奮勇克捷亦當嚴密圍困使賊匪不能外軼以待大兵一舉集
事恐阿爾泰仍無定議復爾疏懈因循於事甚有關繫今令桂林
前往協同辦理桂林在軍機處行走於朕前後所降之旨皆面聆
深悉至彼自可詳悉告知阿爾泰惟當與之和衷商辦不得稍存
畛域之見致令掣肘亦不可稍有推諉之心一切膜視阿爾泰久
任封疆盡心民事實爲出色之人是以加恩擢爲大學士而此次
辦理軍務一味敦體養安坐守無策不知全朕任用顏面實爲憤

懋雖阿爾泰屢次覆奏亦深知畏懼但畏而不改仍屬無益卽如前此因其不能獨肩軍旅令德福迅赴川督之任會商妥辦而彼昨日奏到之摺卽稱俟德福到後再行籌酌進兵今若聞派桂林前往之信復圖坐守則更不知愧恥矣曾不思彼身爲總督邊方要務乃其專責本無可旁貸且係滿洲大學士國家之事何一不當經理豈可因有朕派往之人便思卸責乎至德福初用時朕尙望其能事不意彼前日奏及不必襲擊之說名雖專言緬匪而意實不欲辦小金川不然何以於到川後始奏滇事乎幸朕窺其底衷卽行撤回若留在彼仍與阿爾泰無異且恐更多一阻撓之人矣至桂林此次派往因其年富力強尙可奮勉以助阿爾泰所不及阿爾泰若以外省積習妄爲揣度疑朕專差大臣往彼密查其事則更不能深體朕意矣阿爾泰受朕恩眷甚重因其誠樸任事

簡用綸扉有何可疑之端卽伊自問在任所辦大小諸務又有何可查之處若朕果欲究其過失則就小金川一事已足加罪又何待他求乎阿爾泰惟當屏去妄念竭力自效以副朕成全之思顧惜老大臣體面則得之矣至於行軍要務於該處山川形勢及統兵諸人所在地方並軍營見兵幾何皆當繪圖陳奏朕得以遙爲籌度乃阿爾泰從未辦及全不識用兵機要著阿爾泰卽將小金川一帶毗連境壤及我兵進攻要隘詳繪一圖並將董天弼前在何處進兵福昌今駐何處宋元俊見在何處及阿爾泰久駐之地近日前進幾程逐一貼於圖內並將見在軍營實有綠營兵若干名一併具摺速奏至伊等向來於官兵之外多用土練其意不過爲節省錢糧起見甚屬非是不知土練之怯與官兵相仿而臨陣易退每不足恃如前日守碉之瓦寺土兵百名賊至卽行驚潰已

可槩見況土練調自各土司與賊人必多瓜葛或有漏洩軍情之事亦未可知此後斷不可復行派用計溫福到川進剿時約須精兵萬餘方成聲勢阿爾泰此時當豫爲籌撥除溫福所帶八旗兵及黔兵三千餘名並成都滿洲兵一千名外尙需兵若干就川省各營內慎選勇敢精銳之兵足數備用至進兵時馬匹糧餉火藥鉛丸皆係緊要之事不可不早爲籌備充裕阿爾泰務須實力妥辦若於此尙不盡心臨時稍有貽誤則是自速罪戾矣至溫福在永昌辦理襲擊一事並非欲大舉犁庭難於中止不過至其界內悉力焚殺使緬賊稍知畏懼卽遲一年再辦亦不爲遲且就目下情事而論襲緬轉非要務而小金川之敢抗顏行則不可不急加申討其於國體邊情甚有關繫溫福奉到此旨卽速由滇省取道赴川與阿爾泰會合集兵奮擊剋日擒剿兇渠平定賊壤方爲安

善至溫福前奏以所調黔兵僅有三千名既經進剿撤回復自永昌赴川轉爲遙遠且尙須酌留協駐邊隘欲於貴州下游與川省毗連之處各營調撥等語係就前日情形籌酌今既不辦襲擊則黔兵並不疲勞而分駐沿邊尙有滇省見調之兵可派所留黔兵亦屬無多溫福卽當選擇勇銳者二千餘帶往其不敷之數再飛咨黔省於下游近川一帶揀選精兵如數足用派將領等星馳帶赴川省軍營聽候派用至單內昨日點出帶兵者三十一員其存留永昌者尙有常保住等二十一員爲數未免過多今復於單內點出各員溫福可一併帶往至所留之侍衛等自當令其巡防沿邊要隘遇有賊匪近邊及託名獮夷潛入內地者不拘多少卽行擒獲此事長青卽所優爲去年曾經盤獲賊匪已有成效今復留海蘭察哈國興在彼昨已有旨以此事專責彼三人伊等但能同

心協力諸事自爲周密且有侍衛等往來巡查較綠營將弁亦更爲可信但恐侍衛等因溫福起身後無人管轄不肯出力而彰寶又以客禮相待則留駐亦屬無益著將所有留滇各員卽交彰寶海蘭察管理酌量調遣若伊等不服拘管卽行據實奏聞著將此旨由六百里加緊馳發諭令阿爾泰溫福彰寶及長青海蘭察哈國興知之○庚戌諭軍機大臣等阿爾泰等奏宋元俊進攻小金川奪回賊人所占明正地方一摺所得不過納頂邊谷數處何至過步誇張輒稱全勝已於摺內逐一批飭矣斬賊尙有實據可稽自不敢捏詞粉飾若所稱滾崖落水死者不計其數乃綠旗虛誑惡習阿爾泰何竟信而不疑形之章奏乎我兵此時尙未深入卽明正被侵之地所復亦僅一隅不足言捷而阿爾泰遽有報功之召窺其意總欲圖姑息苟安設或此時逆酋出而認罪求饒阿爾

奏必將遷就此斷不可小金川屢經該督等曉諭遵依復敢反覆
滋釁若又因其請而宥之彼益輕視內地大臣爲無用我兵甫撤
賊眾旋屯更復成何事體况僧格桑竟敢抗拒官兵實爲可惡尤
不可不大示懲創總以剋期覓道進兵擄其巢穴擒獲兇渠將該
處番地番戶分給就近各土司編管撫治並將僧格桑之妻孥近
族及其黨惡土目盡行俘繫請旨辦理其事方能完局至德福摺
奏阿爾泰自五月閒辦理軍務以來業已籌辦兵糧及軍裝火藥
等項雇夫運送並調驛馬安臺從前未經具奏等語殊不可解此
等皆行軍要務阿爾泰旣經辦及何憚而不卽上聞况軍需事宜
隨辦隨奏亦可表其並非安坐玩日且可藉以見長阿爾泰久任
封疆事皆歷練不應疏略若此豈其耄而志昏計不及此乎又土
練一項向多臨敵易退且派自各土司恐於賊人瞻顧不肯向前

或致洩漏機密昨曾諭令此後毋庸派調今此次奪回明正地方
土兵尙覺出力是此輩又未嘗竟不可用惟在善爲駕馭令其奮
勉向前耳著傳諭阿爾泰仍照前酌量調撥土練但須慎選精壯
得力之人勿令以老弱充數並當與官兵相間配用毋使獨當一
面致其游移怯退至見在攻打約咱及收取仲濃等處情形若何
並阿爾泰見在何處均著卽速據實覆奏此旨由六百里加緊發
往並諭桂林知之○劉益因病解任以李本爲四川布政使李世
傑爲四川按察使○撥通倉米三十萬石於直隸備賑○辛亥諭
土爾扈特台吉渥巴錫策伯克多爾濟舍楞等和碩特台吉恭格
等因與俄羅斯風氣不同且不時興兵爭奪不得安生仰企朕推
廣黃教安撫四夷之化率數萬人跋涉遠途不辭勞瘁歸誠效順
殊屬可嘉自應捐地安插使伊等衣食有裨並予以孳生牲隻以

資久遠之計除業經飭交伊犁大臣辦理外茲特加恩錫以封爵
封渥巴錫爲烏訥恩素珠克圖舊土爾扈特部卓哩克圖汗策伯
克多爾濟爲烏訥恩素珠克圖舊土爾扈特部布延圖親王舍楞
爲青寨圖奇勒圖新土爾扈特部弼哩克圖郡王巴木巴爾爲畢
錫呀勒圖郡王恭格爲巴圖色特奇勒圖和碩特部土謝圖貝勒
默們圖爲濟爾哈朗貝勒旺丹爲鄂勒哲依貝子沙喇扣肯爲烏
察喇勒圖貝子奇布騰爲伊特格勒貝子雅蘭丕爾爲阿穆爾哈
貴貝子額墨根烏巴什爲巴雅爾圖貝子拜濟瑚爲輔國公諾海
伯爾哈什哈爲一等台吉俱作爲扎薩克阿喇克巴博克班蒙袞
德勒德什巴雅爾拉瑚策登博羅業林巴木巴爾之子達木拜扎
勒桑根敦諾爾布之子騰特克等十人俱爲閒散一等台吉諾爾
布策楞烏梁海扎克錫禮玉增濟布藏巴特瑪等六人俱爲二等

台吉三達克額林沁達克諾木理等三人俱爲三等台吉巴布勒達克諾音格楞巴圖爾圖古勒扎納木羅布藏楚魯木扎林業林之子舍楞圖古斯蒙庫三達克之子懇澤等十一人俱爲四等台吉爾等仰叨朕恩其加意管束所屬咸務生理延及子孫永荷安全之福矣勸諸勿懈○壬子董天弼奏達木巴宗被困已久急宜救援臣復探得木坪之堯磧一處從山梁而下渡至河北卽係達木巴宗小路臣一面帶兵迅速起程一面咨商阿爾泰等務期設法渡河以斷賊歸路則福昌亦可乘勢徑進得旨此行頗覺勇往看汝如何以功抵過耳○癸丑諭軍機大臣等董天弼奏見由木坪之堯磧地方帶兵攻其不備一摺已於摺內批示矣董天弼因德爾密畢旺拉一帶賊匪俱添人拒守復覓閒道進攻尙屬勇往但伊八月二十日具奏之摺稱兵丁不舉火者已經八日距此

次拜發摺奏時又將半月尋常無事之人久不火食尙難支持况當攻勦之時而令兵丁枵腹從事又無此情理或於何處覓有糧食並何時得有續運兵餉接濟總未據董天弼奏及朕自聞兵丁八日不舉火以來無日不以伊等疲餒情形深爲慮念董天弼何轉不以爲意豈因續經得食遂不復置論抑前說係緣營虛誇之習過甚其詞耶著傳諭董天弼卽行明白回奏再兵行糧隨乃一定之理卽欲令官兵因糧於敵亦不可不籌運以爲接濟阿爾泰旣辦軍務何以於此等處竟未籌及並曾否於董天弼一路運糧接濟之處前已詢問阿爾泰並著速行據實覆奏再董天弼摺內稱見用兵之堯殲與甲金達相近甲金達一處已經阿爾泰派有遊擊陳聖矩帶兵前往等語而阿爾泰九月十一日具奏之摺止有遊擊宋元俊奪回明正侵地情形雖有另派參將薛琮鄭國卿

都司廣著守備李天貴陳尙禮各員亦仍係宋元俊一路其陳聖矩前往甲金達之處並未據奏及該督究於何日派其進兵及令其與董天弼作何聯絡聲援最關緊要因何尙未陳奏殊不可解至董天弼已督兵再進而阿爾泰除宋元俊會約巴旺進攻外並未另籌分路並進與董天弼成夾擊之勢使賊酋首尾不能相顧會勦機宜安在近日阿爾泰曾否籌畫覓路進兵及親自移營董促之處並著卽行據實覆奏此旨仍由六百里加緊發往並諭桂林知之○甲寅 上駐蹕避暑山莊○辛酉諭軍機大臣等前據董天弼奏從木坪之堯磧地方順山而下中隔一河卽係達木巴宗若由捷徑前進易於攻破一面帶兵五百名星速起程一面飛商阿爾泰等語此摺於九月十五日奏到距今又將十日尙未據將進兵以後情形奏聞其與阿爾泰相商之處作何辦理亦未據

阿爾泰奏到殊不可解計該提督進兵之程日以五十里爲率旬日當行五百里卽以三十里爲率亦可行三百里小金川疆界並非甚廣豈有行三百里尙不能直抵賊巢之理是董天弼前奏仍不免沿緣營積習以空言塞責而阿爾泰又視董天弼之進攻與否不以爲意遂置之不論耳豈知朕於此事宵旰慮念自聞董天弼得路進兵之說卽日計其行程盼其信息伊等何總不知仰體朕意隨時奏報平行兵之事大小悉繫機宜計日計程雖若細務而實爲軍營要領非此不能得先後緩急之宜籌克敵制勝之策朕前此辦理金川及平定準部回城諸務悉皆詳爲指畫鉅細不遺用能剋期奏績阿爾泰董天弼何皆視軍旅若泛常於進兵情形並不隨時入告以待朕之揆機遙度得所稟承乎看來阿爾泰等於攻剿小金川一事並未通盤籌畫布置得宜卽董天弼之閒

道進攻亦不過擊其一隅實未嘗計及全局如此安能有濟著傳諭阿爾泰董天弼仍將見在進兵實在情形迅速覆奏○丁卯諭德福前在阿克蘇辦事曾獲罪譴經朕棄瑕錄用數年之內由臬司簡任巡撫因其尙知實力奮勉復加恩擢用總督乃甫至四川卽意存自滿全不似向年之實心任事且敢逞其乖謬之見借漢省事宜欲以諷諭罷小金川之事夫小金川番酋僧格桑去年秋閒與沃克什土司構釁侵擾經阿爾泰前往曉諭僧格桑卽遵守約束斂迹歸巢彼時以番蠻互相仇殺乃其常事且旣已遵諭退回原可無庸再辦曾未半年而僧格桑復敢乘閒攻圍沃克什且及明正土司此豈可復以口舌化導若不用兵剿擒使番眾稍知懲儆何以申威令而靖邊隅乃阿爾泰辦理此事毫無定見惟圖遷就完局因令德福卽赴川督之任協同辦理冀其經畫得宜剋

期集事孰意德福尙未接印卽生畏事之心希欲阻撓軍務妄奏取巧深負朕委任之意著革去總督賞給三等侍衛以己力前往伊犁聽候差委所有四川總督員缺著文綬補授其陝西巡撫員缺著勒爾謹補授○諭承德辦事拘謹於要缺不甚相宜著調補廣西巡撫所有湖南巡撫員缺著梁國治調補其湖北巡撫員缺著陳輝祖調補

冬十月戊辰朔諭昨降旨將德福革去總督雖略言其應行罷斥緣由與小金川大槩而於德福之乖謬取巧及小金川不得已於聲討之故尙未詳爲宣示恐無知者且將爲德福稱屈而疑朕之意或喜兵不可不明白申諭使眾共曉小金川乃九土司之一久隸內地曩爲金川侵擾摧殘特興師命將征服金甕二十餘年得以安居樂業數年前金川閒興綽斯甲布各土司交關節經督提

等遣員誠諭隨即輯和朕知番俗齟齬穴鬪乃其常事原可毋庸過問去年春閒小金川土司指稱沃克什土司用法詛呪致其父子同時染病僧格桑遂藉搜取經呪爲名引眾前往攻殺經該督委員查辦雖暫停兵革仍未遽解圍彼時阿爾泰意欲剿撫兼行朕以其端雖曖昧難明而齟齬相爭互存曲直不宜有所偏向輕議加兵且僧格桑犢性未馴罔知利害因諭該督等詳悉開導冀其感悟自新阿爾泰董天弼卽於八月內前至土境僧格桑迎見督提跪聆訓教悔罪汗惶情願退地撤兵永不侵犯具結遵依遂亦宥其既往孰意僧格桑怙惡不悛抗違教約於本年六月乘閒攻圍沃克什並占瓦寺之巴朗拉拒阻援兵尋且侵及明正土司地界是其藐視督提肆無忌憚豈復可以口舌化導而阿爾泰等惟思姑息了事意見游移雖云當臨以兵威不過虛張聲勢無論

其不足以懾兇渠之膽卽使其暫時求息勉強面從而我兵甫回賊眾復集致令封疆大吏僕僕靡甯成何事體且小金川以內地土司敢作不靖暴侮鄰疆弁髦國法此而不聲罪致討朝廷威令安在况撫馭番蠻懷畏自當並用若於梗化之人不大加懲創則懦弱者無以自存而獷悍者必效尤滋甚漸至徼內土酋跳梁化外何以綏靖邊圉至於佳兵之戒朕所深知豈肯稍存好大喜功之見如前此平定準部回城皆由叛賊之負恩逆命罰在必伸卽近年征討緬匪亦因懾駭之屢抗顏行事難中止然察其水土惡劣官兵非可久留隨命振旅而還不復再議大舉卽賊酋狡計激怒不肯墮其術中是朕不欲黷武之心與知難持重之意實無不可共白於天下也若今僧格桑之冥頑不率非擒戮無以肅憲典而欲擒兇監非攻勦無以抵賊巢是此小金川之兵誠有不得不

用者然猶不欲特發京兵勞師遠涉惟以阿爾泰未嫺軍旅恐誤機宜因命溫福兼程赴川董率調度以冀剋期集事無使我兵練等久勞行陣此朕審慎籌度之衷與必應翦刈之勢更無不可共白於天下也且朕春秋已逾六旬御宇三十六載經事已多臨事知懼豈不欲甯人偃武頤適幾餘况旣云用兵運籌每縈宵旰而軍書夜閱甯不疲勞卽如前日董天弼開道進攻久無奏牘輒爲虛念不置至於廢寢朕又何所樂而必用兵乎而用兵之事於朕躬有益乎無益乎此愈無不可共白於天下也至德福前在阿克蘇時一聞烏什之事卽倉皇無措思棄阿克蘇而回因將伊革退留於新疆效力而派明瑞統兵勦定其城意彼經前番儆戒或稍知改悔是以棄瑕錄用復不次超擢授爲巡撫頗覺奮勉因命其兩署督篆其初至雲南時所奏各摺尙似實心整頓方謂其足以

任事爲國家得力之人因卽命爲四川總督令馳驛通行往助阿爾泰協力妥辦軍務乃伊旣至四川省城並不計及小金川之當作何籌辦轉具摺陳緬賊情形謂不宜進兵襲擊其識見乖謬實出意料之外夫襲擊一事與大舉不同並非欲直擣阿瓦亦非欲徑取猛密其速辦緩辦原屬不關緊要第因賊匪敢於反悔詭詐豈可竟置之度外不過出其不意蹂彼近疆乘勢誅掠焚燒令賊匪知我並未歇手稍爲畏懼且涉冬而往開春而還亦不致輕冒瘴癘何至過於顧慮以爲必不可行耶至所稱恐其報復尤屬荒唐可鄙緬匪所恃者地險而氣惡惟能以逸待勞並非勇於戰鬪從前數次之闖入內地皆由彼時沿邊無備而趙宏榜李時升朱崙又庸劣不堪兼之滇省綠營兵弁恒怯無用致賊匪得以尾追直入今數年來邊防頗爲整飭且特派大臣統八旗勁旅在彼若

賊匪敢於輕離巢穴侵及邊境正可奮勇出擊悉力殲擒使之喪
膽何反虞其乘機掠我土司耶至其所畫之策則欲令哈國興屯
駐邊外差傳諾爾塔到營宣諭更爲愚謬無識以諾爾塔之狡譎
哈國興用何法招之使來且彼未經挫衄又何畏哈國興而能一
呼卽至揆之情理實所必無並恐諾爾塔不來而哈國興轉爲誘
往昨年彰寶所遣之都司蘇爾相爲賊拘留特一偏裨耳思之尙
爲切齒今哈國興以總鎮大員設爲賊羈而不反豈不失體損威
德福身係封疆大臣獨不思以國事爲重而逞其臆見自詡爲能
操勝算乎然察其所奏名爲不必襲擊緬匪其心實不肯辦理小
金川故爲指東擊西以售其詆欺之術耳如果確有所見發自天
良則彼自今年三月接署雲貴總督距其七月閒自永昌起程已
將半載何不於在任時及早敷陳直待行抵成都方爲此奏若以

爲事體重大必須面達則彼八月初甫至黔省途中雖併程馳傳亦須俟朕行國事畢出哨後始得陛見已屆九月中旬即使朕允其所請迅速傳諭溫福計溫福接到時業經進兵襲擊已屬無及德福豈不籌度及此其意不過以幸得總督實缺急圖完局撤兵安享豐厚而又不敢明言故借緬匪以巧飾曲說此等伎倆豈能於朕前嘗試乎至其明白回奏之摺一味支離理窮辭遁不啻見其肺肝更無論矣今彼兩摺具在均著發鈔使見之者知其罪由自取乃德福負朕委任期望之恩朕於彼並無絲毫屈抑也將此一併通諭中外知之○諭鄂寶本一拘迂自守之人近復不肯實心任事難勝封疆重寄著來京候旨山西巡撫員缺著三寶補授○卽行來京請訓前赴新任其貴州布政使員缺著圖思德補授○以畢沅爲陝西布政使敦福爲陝西按察使

由湖北襄陽道遷

○調王太

岳爲雲南按察使法明爲湖南按察使○己巳 上奉 皇太后

自避暑山莊回鑾○以楊魁爲安徽按察使由江蘇松○庚午諭

大道還

各督撫每年有題報並無逆犯馬朝柱一疏具文相沿殊非覈實

之道馬朝柱於犯案時雖倖逃法網未得明正典刑但該逆犯罪大惡極爲覆載所不容其事又閱二十餘年之久自己早伏冥誅且方今法紀肅清所在督撫訪查奸匪亦頗爲實力使逆犯或果匿迹偷生亦必久經弋獲斷無尙容其潛竄之理是各省之所爲躡緝原亦不過循海捕虛名而歲煩奏牘遂成故套甚無謂也況愚民無知每有假逆犯爲名捏詞誣告轉致羅法者而不肖胥役或藉稽察之名勒索里下亦所不免是存此無益空言轉滋流弊尤非所以崇簡易務實要也光天化日之下魑魅必無從遁形嗣後各省每歲題奏並無逆犯馬朝柱之例卽著停止○阿爾泰奏

臣等前此收復納頂等處地方一面飛飭該將弁等乘勢掩殺臣
又於九月初二日親往章谷軍營督催攻勦節據宋元俊稟稱自
官兵渡河之後帶領土百戶等連日奮勇進攻又收復仲濃大寨
索布密剛瑪哩五處殺死小金川大頭人一小頭人二及賊番二
百餘生擒五十餘我兵陣亡二名帶傷四十餘名其明正土司碉
寨七百餘所已全克復又攻得小金川噶中拉莫茹納扎功拉四
處地方見在進攻小金川約咱大寨等語臣見同副都統鐵保督
催官兵奮力攻擊其收回明正番民碉寨業交明正頭人管領安
插寨內藏匿被擒之賊照例分賞各土司其陣前擒獲及訊明會
經抗拒者立即正法再董天弼改由木坪一路開道進攻所需兵
糧亦經趕辦諭軍機大臣等阿爾泰奏克復明正土司被侵之地
並得小金川噶中等四處見在進攻約咱大寨所辦略有起色

阿爾泰因朕節次飭諭實力督催將弁等亦稍知自勵因得屢獲克捷可見人果奮勉向前其效立見阿爾泰益當加意董催乘勝深入直搗賊巢前諭令溫福赴川督辦並諭阿爾泰此時且暫停攻剿俟溫福到後合兵進討剋期集事昨又授文綬爲四川總督令其赴川助辦今阿爾泰旣已得手正可鼓其銳氣一往直前並促董天弼等上緊夾擊並派練習帶兵之將領分路合攻使番酋首尾不能相顧自可得制勝要領不必拘泥前旨坐待溫福文綬若能於此時卽抵賊巢擒僧格桑分定其地尙係阿爾泰全功設因此次小勝遂存自足之心不復努力非惟自怠垂成事機可惜且溫福文綬到後埽穴擒渠其功卽與阿爾泰無涉矣至遊擊宋元俊勇往立功殊堪嘉獎遇有川省副將缺卽行奏補其出力各土司業將俘獲番眾分給所有跟隨宋元俊進攻之士百戶等阿

爾泰亦當量加獎賞以示鼓勵○乙亥 上奉 皇太后還京師

○丙子諭軍機大臣等據阿爾泰覆奏籌辦調兵事宜及接運糧石各摺總不中事之肯綮如所稱調兵二百添派參將觀太前往西路幫同福昌妥爲固守之語太不成話前因阿爾泰安坐數月漫無調度必致遷延貽誤是以諭令溫福往彼督辦兼以阿爾泰等庸懦無能恐其舉措不合機宜轉屬無益因諭伊等如不能奮勇進攻卽當嚴密圍守使賊匪不致外軼以待溫福到川妥辦原以激阿爾泰等冀其稍知愧奮昨阿爾泰旣派宋元俊由巴旺一路帶同土兵進剿將明正被侵之地已全行克復所辦似稍有起色正當奮力深入以期迅抵賊巢不應仍爲坐待之策卽董天弼一路原有兵練及添派之兵共六千八百餘名而董天弼帶赴木坪者共三千八百餘名尤當奮勇速進使賊酋首尾不能相顧方

合行軍要領至福昌在巴朗拉一路亦有兵三千餘名兵力不爲單弱縱其地見有賊人拒阻難於直入亦當籌酌形勢相機攻打俾賊眾疲於支應以挫其鋒何得僅爲固守計金川小醜豈有調兵如許之多爲時如此之久惟資坐守不獨玩失事機甯不爲賊人所輕笑耶總由阿爾泰等辦理此事始終毫無成見一味心存觀望如何能剋期集事卽所復之明正侵地尙恐其未必能周防無失昨已傳諭令其選派將領統兵駐守無稍疏虞今日溫福奏到已於九月二十八日帶領滿洲兵及黔兵三千名分撥由永昌起程馳赴川省計其到軍營甚速此時阿爾泰董天弼如能分路夾擊擣穴擒渠以贖前過斷不宜復有懈弛若竟自揣無用甘於讓人止可俟溫福到川辦事朕亦無如之何矣再董天弼帶領由山神溝進攻之兵八日不舉火一節朕初聞其奏到深爲廕念昨

董天弼覆奏稱兵由閒道進攻恐煙火爲賊人驚覺因令裹帶乾糧等語今阿爾泰奏亦相同是各兵既有乾糧可以充饑並非枵腹從事官兵爲國宣力分所宜然豈身臨行陣必待張筵恣啖然後謂之飽食耶此乃董天弼深染綠營惡習專務虛誇實爲可鄙可恨至阿爾泰所奏見駐章谷督兵進攻之處並未將章谷距彼前駐之打箭鑪計程若干及章谷是否卽係用兵攻奪之地詳悉聲明是阿爾泰之意惟圖含糊掩飾設果係督兵進攻之地則彼前奏九月初二日親往章谷今兵已漸近而彼仍駐章谷不移其非隨兵深入已可槩見如此而附名進攻何異身在京城籌辦古北口以外之事亦可謂之親督耶阿爾泰身係滿洲大學士承辦軍務自當實心出力倍於眾人不應置國事爲無關重輕視國法爲不足畏懼朕於軍興之際執法嚴明如前此西師之役策楞哈

達哈達爾黨阿並以玩誤治罪而金川之事訥親卽以乖張伏法
前車覆轍尤爲近而可徵訥親獨非大學士乎且彼係元勳後裔
備職禁近夙夜宣勞十有餘年乃朕所腹心委任者而身獲罪譴
尙不能爲之廢法曲貸阿爾泰不過因其歷任封疆竭誠辦事此
外並無可見長之處且督撫所得廉俸甚厚平時豐衣足食卽勤
勞宣績亦職分所當爲並無足爲異朕將伊特擢綸罪加恩已過
於優渥阿爾泰亦當深知感奮何竟漠然全不動念耶試令阿爾
泰自問其爲國家出力之處比訥親若何朕向來待訥親恩眷較
阿爾泰若何訥親犯罪尙不能邀朕寬宥阿爾泰果何所恃而不
懼豈以大學士爲所固有可爲護符而倚老賣老妄存毫不加刑
之見耶伊辦理小金川以來游移延緩已非一次朕皆曲加原諒
冀全其老顏面若阿爾泰不自顧惜仍然執迷不悟貽誤大事致

於朕之顏面有關朕雖欲再行寬恕亦恩無可施而法難曲徇訥親炯戒具在毋謂朕戒之不豫也著嚴切傳諭阿爾泰令其痛自猛省及早奮勉自效並將所詢各情節及見在進攻情形若何迅速覆奏至軍營文武各員功罪前已諭令溫福桂林留心察覈俟事竣後據實分別奏聞候旨著再諭溫福等除阿爾泰董天弼二人前後所辦之事絲毫不能逃朕洞鑒毋庸另記外其餘大小各員並逐一詳加覈記毋稍疏漏將此由六百里加緊發往一併傳諭知之○丁丑諭新土爾扈特郡王舍楞等懇在科布多阿勒坦附近地方居住以期永荷朕恩情詞懇切已允所請矣舍楞著加恩授爲盟長沙喇扣肯授爲副盟長與車凌烏巴什一體輪駐科布多學習行走應得印信及應編旗分佐領各事宜著交該部俱照車凌烏巴什等之例辦理○辛巳諭昨據吏部將各部分別堪

勝繁簡缺知府之人員帶領引見內有保送簡缺兵部郎中張萬國一員朕閱其人年力衰庸卽簡缺亦難勝任因降旨將該員仍行留部並令查明係何堂官保送則係官保署事時同蔡新等註考咨送引見甚屬非是各部院司員在署辦事情形該堂官皆所習見至年滿截取分別繁簡自當秉公覈實不得稍事姑容方爲允協夫尙書侍郎身係國家大臣乃於保送一事惟知奉行具文冀博屬官虛譽此在品秩卑微者已難辭識見猥鄙之咎况堂官有爲國甄別人材之責而不知顧名思義可乎且此等截取人員出爲知府有表率僚屬整頓地方之責是一人之得失所屬州縣百姓之利病隨之今欲姑息一衰庸無用之人俾得遂其一麾出守之私願而置地方利病於不顧范仲淹之語該堂官等甯未之前聞乎向來外省驗看截取舉人率多沿襲故套不能實心激汰

惟何燭前護撫篆時曾有請將衰老舉人徐庭槐改教之奏當經
明降諭旨令各該督撫依照遵行而兩年來各省仍未見一據實
奏辦者昨惟何燭復有請將舉人申超改教職一摺所辦甚是又
申諭各督撫實力舉行以重民社之寄今以部院司員截取知府
大員職任尤鉅若該堂官等如此心存瞻顧漫不經心竟以外任
以受該員賢否諉之該省督撫設令該督撫亦如此居心則貽誤
甚大就使到任後一經體察即行登之彈章於該員既難保全而
人缺紛更官方已深受其弊大臣等撫衷自問亦何所爲而因循
出此耶所有此次濫行咨送張萬國之兵部堂官官保蔡新綽克
托李宗文蔣元益俱交部議處嗣後各部院堂官於保送堪勝繁
簡知府之員如有仍蹈此轍者必不再爲寬貸將此通飭各部院
衙門堂官並直省督撫等知之○甲申禮部議准護陝西巡撫勒

爾謹奏陝西涼州一府鄉試士子試卷應准其歸入通省卷內無庸另編字號其甘肅西甯編爲聿左號肅州安西烏嚕木齊等處編爲聿右號准其各取中一名其聿左右號每科於通省卷內取中補數之例應行停止從之○乙酉諭向來翰林院侍讀侍講學士及侍讀侍講中允贊善等官有需次候補者例俱坐補原官不得通融借用此等詞曹清秩額缺有數一經回籍至來京應補時輒格於成例未免守候需時因思讀之與講繫銜雖殊品秩相等而漢缺中允贊善亦非若滿員之銓用殊途分別五六品頂帶者可比從前坐補之例未免過於拘泥卽稍爲變通於體制亦無妨礙嗣後此等候缺人員讀講中贊准其各自通融補用著爲令○諭軍機大臣等據李侍堯委員解到暹羅丕雅新掣獲番男八名番婦四名交軍機大臣詢問雖係青羅國民人居多而瀉都燕達

一名實係緬匪小頭目丕雅新之選檄擒獻尙非無因而其心頗知恭順前歲丕雅新遣人奉書李侍堯欲求轉奏請封李侍堯因其於暹羅殘破之後戕害詔氏子孫乘機竊據不應妄冀封號曾奏聞拒斥今歲以擒花肚番逆匪爲名仍希封賞復不從所請其論雖亦近理而不免過甚荒徼島夷不知禮義其易姓爭據事所常有如安南國陳莫黎諸姓亦屢更其主非獨暹羅爲然况丕雅新當緬匪攻破暹羅時以報復爲名因利乘便並非顯有篡奪逆蹟而一聞內地大臣檄諭奉命惟謹卽遣兵攻打青蘊其所擒獲更有緬匪頭目是其實與緬夷爲仇已無疑義且屢次邀封望澤尙知尊戴天朝自不必固執前見絕之太甚至其代立原委原不必拘於名分從而過問丕雅新初立勢孤欲求依附若中國始終擯棄弗納或彼懼而轉投緬匪非策之善也著傳諭李侍堯嗣後

不雅新處若無人來則已設或復遣使稟請加封願通朝貢不必如前固卻察其來意果誠卽爲奏聞予以封號方合羈縻控馭之道著於該督奏事之便傳諭知之○丁亥賜林天彪等五十人武進士及第出身有差○諭楊廷璋年齒已逾八旬精力漸不如前總督職任繁劇恐不能鉅細周到而內部事務尙可從容經理著來京補授刑部尙書范時綬著專辦正白旗漢軍都統事務直隸總督員缺著周元理補授其山東巡撫員缺著徐績補授○戊子阿爾泰奏臣攻約咱一路自克獲噶中茹納拉莫等處地方後續又攻得附近約咱小礮三座賊番於昏夜潛來偷奪當經哨兵望見各將備等率兵奮力迎殺追趕賊番逃逸查驗槍斃賊五十六割獲首級十三生擒三名參將鄭國卿等俱得石傷漢土兵練內受傷一百六十餘名陣亡二十八名除分請卹賞並飭嚴密防守

外又飛行藩司將該路兵糧就近措辦接濟見已運赴軍營米二千餘石麪一萬斤尙有續辦米石隨即運往並辦火藥等項以資官兵併力合攻諭軍機大臣等阿爾泰奏續得小礮三座並掩殺潛來奪礮之賊稍覺奮勉所有出力攻礮殺賊之弁兵等自應確查錄記俟事竣通行覈辦其在事兵練之傷亡者亦應查明照例分別賞卹今旣續得賊礮殲戮番眾已少挫賊人之氣自應乘勝深入阿爾泰可不急思奮勉以圖晚蓋乎惟阿爾泰稱九月初二日起程初七日至章谷其地相距四百餘里何至需期六日况軍行機要刻不容緩不應濡遲若此至所稱辦運軍糧火藥接應之處均係行軍要務但見在溫福自滇赴川省之滿洲兵及黔兵共三千餘名而川省各鎮營兵續有添派兵數較前倍多則糧餉亦當籌備無缺而所需火藥鉛丸尤關緊要必須寬裕豫備方爲得

力設臨時供用稍有不敷惟阿爾泰是問○庚寅董天弼奏臣於九月三十日到木坪查看道路自小關子起至堯磧一帶多係山巖一至堯磧以外即可直抵甲金達見在甲金達地方已有陳聖矩帶兵前往小金川亦於附近要隘修立戰礮臣擬先破戰礮占據形勢則東北可以救援達木巴宗西北可以覓路進攻小金川之美諾與出本布爾桑岡等處較爲便捷况甲金達一路天氣尙爲和暖非比卧龍關外早有冰凍之患見在挑取精銳由堯磧前進計十一月二十三十四兩日督兵攻奪報聞○壬辰以嵇璜爲工部右侍郎

由左副都御史遷

○甲午諭陝甘總督吳達善久任封疆老成

練達近於陝甘任內辦理諸務更見周詳妥協昨以患病奏請解任調理曾經降旨特遣御前侍衛帶領御醫前往診視並令文綬暫行留甘署篆俾得安心調攝以冀速痊今聞溘逝深爲軫惜著

加恩晉贈太子太保入祀賢良祠所有應得卹典仍著該部察例

具奏尋予祭葬諡勤毅○調文綬爲陝甘總督

由四
川調

十一月丁酉朔定邊右副將軍尙書溫福奏臣於十月十八日抵成都詢知桂林於十月十六日前往打箭爐至阿爾泰久駐章谷董天弼已於九月初自西路卧龍關改由木坪一路目下攻勦情形無從詢悉適各路差人回省詢稱南路打箭爐至章谷四百五十里阿爾泰見在駐營約咱去章谷二十五里副都統鐵保等領兵攻打阿爾泰於十月十五日亦往約咱又雅州前抵木坪至堯磧一百三十里董天弼定於十月十四五日由木坪進攻堯磧又西路自汶川縣至卧龍關二百七十里卧龍關至山神溝口七十里總兵福昌於該處安營近日建礮一座防守路口八月十三日帶兵千餘進攻巴朗拉奪得石卡三座攻打礮樓因連日大雨槍

破難施十九日仍回山神溝等語臣查此事辦理之始所以兼從南路進兵者原因金川占據革布什咱是以於此進剿道路迂遠本非進兵正路察看情形當以西路爲正路南路自章谷進攻西路自北直進取其中堅前後夾攻使腹背受敵自不難於殲滅董天弼舍此不攻改由木坪不解何故擬同阿桂先赴章谷與阿爾泰公同商推約計官兵到日趨赴西路統領進剿又見在所謂征兵南路爲多此路雖距賊巢較遠但兵丁已前往若西路奮力攻剿南路亦可乘機進取以分賊勢自不便將見駐兵分移西路臣見帶貴州兵三千又密飭貴州豫備二千飛調赴川徑往西路但統計西路福昌見帶之兵及臣帶往滿兵二百黔兵三千續調二千數僅七千該處在在堅礮口隘甚多均須派兵分布臣先統見有之兵儘力攻剿揆度事勢尙須添兵查陝甘兵素稱強壯且與

川省毗連似可調用得旨所見已得要領佇俟捷音諭軍機大臣等辦理小金川一事總由阿爾泰董天弼姑息了事並未早爲籌辦將來辦理藏事阿爾泰董天弼功罪自不容掩此時姑且無庸置議况董天弼不過武夫非若阿爾泰以閣臣兼辦總督經理不善者可比而漸染綠營惡習專務虛誇實爲可恨伊見從堯殲一帶進攻若果自知奮勉勇往建績未嘗不可抵蓋前愆設復觀望不前坐昧機要卽於軍營正法示眾亦其罪由自取必不能復爲曲貸耳至溫福以西路與賊巢最近欲於西路進攻自爲扼要之見但其情勢亦不可不爲審度賊人所以拒守巴朗拉者原因攻圍沃克什遂於要隘設築碉卡扼我援兵賊旣倚爲負隅之勢且圖自衛其死守之必固而番人之碉卡其料皆取於近地集眾合作不難終日而成無論大礮轟擊未必能頃刻摧堅卽幸藉大礮

之力攻破一礮賊卽乘其殘壘退而復築勢豈能層層攻擊若於用礮之外令士卒輕冒矢石奮力攻取儻或稍有挫損更覺不成事體看來小金川壤地有限人戶無多除約咱巴朗拉兩處外斷不能分布抵禦此時南路既有重兵西路復添兵力聲勢極盛僧格桑自必盡力守此兩處不暇他計朕意總以爲攻取之要策必當避其礮卡越道而進使賊人失其憑恃官兵得以乘閒擣虛若能徑抵賊人巢穴擒獲兇渠則兩路雖有堅礮不攻自破如此方爲制勝之道況小金川蕞爾蠻陬尤非緬地瘴癘可比而其人眾又俱資耕作爲業更非能經久相持惟在各路急攻弗懈使賊首尾不能兼顧並遵朕昨降之旨設法招誘使其自相解體可望速奏膚功至此次進勦小金川必當一舉集事如兵尙不敷分撥卽添撥陝甘官兵備用亦所宜然朕惟期於事有濟並不惜此添調

之費見已諭令文綬密爲選備二三千名兼爲籌辦軍械等項聽候調撥著傳諭溫福悉心籌辦如果尙須添兵若干卽飛咨文綬如數派撥將此並諭桂林知之○戊戌軍機大臣等議准伊犁將軍舒赫德奏遵旨籌畫新疆駐兵請於烏魯木齊駐滿兵三千添設參贊大臣領隊大臣各一員巴里坤駐滿兵二千添設領隊大臣一員其領隊大臣令參贊大臣兼攝俱統轄於伊犁將軍塔爾巴哈台見有戍兵千餘添兵作爲二千名從之○以黃登賢爲左副都御史原任漕運總督○己亥諭鄂寶本拘謹自守之人雖不宜巡撫之任而被議尙非大過著補授刑部侍郎其革職處分卽帶於新任綽克托著實授兵部侍郎不必兼辦刑部事務伍訥璽見在出差瑪興阿仍著署理刑部侍郎事務期成額以兵部侍郎在葉爾羌辦事俟差滿回京後再行補缺○乙巳溫福奏臣於十月二十

七日行抵清泉縣地方據雅州府知府江權稟稱探得提督進兵於二十四日攻破甲金達賊番四散並聞牛廠已得不日直入達木巴宗等語臣細閱輿圖查阿爾泰所駐章谷在小金川巢穴美諾之南相距本遠然所攻約咱已屬小金川之地不可無兵以分賊勢至董天弼所進堯磧一路在美諾之東見在攻破之甲金達及將到之達木巴宗係賊匪占據之沃克什地方查達木巴宗之北如巴朗拉一帶賊已多建碉卡而福昌一路兵力單弱未能卽進今董天弼果能直抵達木巴宗則福昌等乘勢進攻不惟可與董天弼會合且從此直搗美諾勢較便捷況董天弼旣經深入其情形與前不同自當添兵接續見可調往木坪者有成都滿兵四百甫抵雅州令其前往堯磧速赴董天弼軍營至西路巴朗拉一帶賊人防守雖嚴然督率勁旅夾擊必不能首尾相顧況阿爾泰

軍營見有桂林前往臣不敢拘泥前奏仍往章谷轉致檄過卽率
領已到官兵前往西路進攻得旨嘉獎○丁未諭本年恭逢 聖
母皇太后八旬萬壽慶洽敷天直省督撫各級芹曝之私以達下
忱而申祝嘏自屬禮所宜然乃諸臣中呈進貢物未免臚列太多
甚有以金器充飾過滋糜費者在諸臣備物抒誠諒不致累及民
閒取次下屬必出自養廉購辦但養廉一項乃國家優恤臣工厚
予祿精以資辦公之用若悉以備物進獻則於衙門公事用度轉
致缺乏且此次貢物竟有浮於歲入養廉之外者似此踵事增華
仰惟 皇太后九旬百齡大慶 慈壽無疆諸臣貢物厯次遞增
伊於何底旣非所以體 聖母敷錫逮下之慈懷亦不能副朕推
恩體恤之至意卽如朕上年六旬誕辰諸臣所進不過酌留一
二以聯上下之情並無取乎誇多競勝從前疊經降旨甚明各督

撫等嗣後務宜恪遵朕諭無再徒事彌文果能各盡職守實心宣力共佐昇平之治朕之所寶孰大於是著將此通行飭諭知之○
戊申冊封貴人汪氏爲 惇嬪○庚戌董天弼奏甲金達距堯磧八十餘里小金川於甲金達對面山梁要口修有碉房二座臣帶領將弁於二十四日併力攻擊斃賊十數人餘皆退入碉房連日礮打未能卽破山梁北下係沃克什牛廠卽小金川來路二十七
日臣分兵繞道潛往截守牛廠賊二十餘人又將牛廠據住至二十八日半夜賊番直撲營盤官兵俱有準備施放槍礮賊番退走牛廠東北尙有橫亘山岡賊番在上修卡又分路上攻立時占據至十一月初一日從所占山梁向上攻擊賊番驚逃所有木坪沃克什及小金川三土司交界要隘已全攻獲自此向西北進兵一
至本布爾桑岡卽距美諾不遠由東北四十餘里可直救達木巴

宗今沃克什土司色達克拉之弟雅滿塔爾自達木巴宗突出稟稱知救兵已至專候速進內外夾攻等語臣思達木巴宗待救甚急且相離較近若將圍困達木巴宗賊兵先行擊破則已出巴朗拉之後俟副將軍溫福迅赴西路兩面夾攻至巴朗拉道通則小金川進兵之地又不止於本布爾桑岡一處臣當會同溫福妥商辦理分路進兵速期剿滅諭軍機大臣等據董天弼奏攻得甲金達山梁並占據牛廠所辦稍有起色其地既去達木巴宗不遠董天弼自當乘此勝兵進攻達木巴宗以扼巴朗拉之後路且色達克拉之弟既能逸出則達木巴宗聲息已通內外夾擊施功尤易據董天弼奏稱攻取牛廠繞道潛往可以邀截而得可見攻剿要策必當避其堅礪尋覓閒道始爲事半功倍至僧格桑敢於圍困沃克什抗拒官兵情罪實難輕宥設逆酋因我兵全力進攻勢難

支禦窮蹙乞降斷不可許節次所降諭旨甚明阿爾泰溫福務須
遵朕前旨分路夾攻直搗巢穴擒獲逆豎分定其地切勿稍存姑
息遷就完事○辛亥撥湖北等四省庫銀三百萬於四川備用○
丙辰 上自圓明園奉 皇太后御輦乘騎前導王以下文武各
官暨大臣命婦並在籍紳士人等於恭祝 萬壽亭前跪迎賞賚
有差 皇太后駕還宮 上還宮○恭上 皇太后徽號曰 崇
慶慈宣康惠敦和裕壽純禧恭懿安祺皇太后○欽差侍郎桂林
奏查進剿小金川見有三路一從瓦寺之巴朗拉入小金川咽喉
是爲大路次從甲金達救援達木巴宗而趨美諾攻擄小金川腹
心是爲中路再次則繞小金川尾間由約咱進攻僧格宗是爲末
路此一路自打箭鑪至約咱經過茂鈕等處俱與金川所占革布
什咱地界相連自不應由此而進臣細加察訪始知阿爾泰原因

籌辦革布什咱一案駐紮打箭爐又值小金川潛行肆逆攻圍沃克什並奪取明正地方邀飭宋元俊等統兵前進宋元俊帶領見有之兵並駕馭巴旺布拉克底收復明正之納頂邊谷等處阿爾泰並未通籌全局卽思由此進取繼而宋元俊統兵渡河克復明正地方並克小金川扎功拉等寨所得礮卡均須留兵防守及至約咱兵力旣分遂難深入嗣宋元俊屢以添兵爲請又復游移中止今聞董天弼已克甲金達山梁副將軍溫福復帶兵改赴西路兩處悉銳以搏賊巢阿爾泰此時支絀屢見勢不得不議請添兵誠爲迂緩但該酋等狼狽爲奸設金川或阻歸途或斷糧道關繫非輕若竟撤兵改途進發已復之地又爲金川所有更復成何事體是約咱本屬無足重輕之地致成最關緊要之區必須大增兵力分防各隘並派撥兵練訪覓閒道直趨美諾襲取賊巢見督將

領相機進攻與木坪巴朗拉兩路遙爲聲應俾賊酋首尾不能相顧以期迅奏膚功阿爾泰奏查明正土司地方與金川所占革布什咱連界處甚多自喀勒塔爾以至茂紐東谷剛察章谷一帶約三四日之程均係見在進攻約咱之後路據布拉克底差人密告宋元俊言小金川屢求索諾木發兵阻截大兵糧道宋元俊措詞譚諭以安其心索諾木始行撤兵又小金川防所屬番民投順內地將各路賊番調換守卡使有家室可戀並於約咱礮內刨挖地窖礮外刨挖土滾皆如金川當日之故智南路兵練雖有八千八百餘但此內派赴各糧站山梁礮卡防禦外進攻約咱之兵不過二千實不敷用且喀勒塔爾等處界連革布什咱防兵尙覺單弱可虞索諾木此時雖未敢妄動儻或慮及唇亡齒寒且爲小金川句結萬一絕我糧道關繫匪輕計南路喀勒塔爾茂紐章谷一帶

須添兵五千始足以壯聲勢並可消阻索諾木之異志約咱軍營
須添兵三千方足以迅速攻取懇於附近川省之貴州陝甘湖廣
等處共撥兵八千選派勇幹將領速帶來川仍令川省各營招募
新兵數千名隨時撥用諭阿爾泰辦理小金川之事養癰玩寇漸
成大事自五月內卽往打箭鑪駐兵三月有餘株守不動及接朕
節次促令進兵之旨始行拮据籌畫調兵造船渡河爲攻擊之計
以致賊番得以從容設礮支禦是官兵之未能迅速進攻皆由阿
爾泰貽誤朕復促令督兵直進始移至章谷旋次約咱到約咱後
又已而月仍然按兵不進及聞溫福將到始趕鑄大礮計圖掩其
遲延之迹其心更不可問朕屢加開導不啻十餘次冀其痛自猛
省以收桑榆之效初不料其執迷不悟一至於此總督統理全省
軍務於邊陲要地撫馭諸番尤其專責況阿爾泰係滿洲大學士

當以國事爲重乃竟漠然不以爲念惟圖掩飾偷安直至此日始請添兵攻剿意存諉卸若他人如此負恩貽誤卽當按軍法從事朕尙念阿爾泰平時辦事之誠暫從寬典阿爾泰著革去大學士總督留於軍營辦理一切軍營糧餉等事效力贖罪若再稍有遲誤卽於軍營正法示眾伊在川日久地方情形皆所熟悉一應大小文武皆其舊屬斷不致因其罷職呼應不靈若果有抗違不從阿爾泰原不妨據實參奏卽將違誤之人重治其罪溫福著加恩補授大學士所有四川總督員缺卽著桂林補授將此通諭中外知之○丁巳諭素爾訥著調補理藩院尙書戶部尙書員缺著舒赫德補授舒赫德未到京之前所有戶部尙書事務仍著素爾訥兼署戶部侍郎員缺著福康安補授○溫福奏臣於初十日抵卧龍關總兵福昌先已帶兵進駐鄧仍計距卧龍關一百餘里臣一

日即可趕至該鎮營盤查福昌前因兵力單弱未能前進所以巴
朗拉賊匪情形未能深悉俟臣抵彼時覓路進剿至由滇赴川之
黔兵三千名計抵軍營須在十一月盡十二月初臣見帶滿洲官
兵五百餘加以福昌處所有兵一千七百餘共二千二百餘名兵
力實未充裕臣抵山神溝鄧仍等處察看事機如果刻難少待卽
就見有之兵奮力前進儻不得不稍集兵力則俟黔兵三千名到
齊併力進攻似此三路會剿不但沃克什地方可全克復而小金
川逆酋亦斷不能稍稍殲戮萬一賊人死守窟穴尙藉添兵臨時
酌量情形謹遵諭旨一面飛調黔省續派之二千並文綬選備之
陝甘兵二三千務在埽穴擒渠一舉集事得旨所見俱合機宜佇
俟捷音○戊午賜三班九老宴遊香山命於次日赴乾清門內令
畫工艾啓蒙繪圖文職九老顯親王衍潢恒親王弘晳大學士劉

統勦協辦大學士刑部尙書官保吏部尙書託庸刑部尙書楊廷
璋理藩院尙書素爾訥刑部侍郎吳紹詩工部侍郎三和武職九
老都統四格都統曹瑞散秩大臣國多歡散秩大臣銜甘都副都
統伊松阿副都統薩哈岱副都統李生輝副都統福僧阿副都統
色端察致仕九老刑部尙書銜錢陳羣內大臣福祿禮部尙書陳
惠華兵部尙書彭啓豐禮部侍郎銜鄒一桂左副都御史呂熾內
閣學士陸宗楷詹事府詹事陳浩國子監司業銜王世芳○庚申
予經壇祝嘏人員加級復銜有差○辛酉 皇太后聖壽節 上
詣 慈甯宮侍 皇太后宴綵衣舞奉觴 皇子 皇孫 皇曾
孫額駙等以次進舞禮成 御製 聖母皇太后八旬萬壽 鴻
稱積慶頌八章○壬戌溫福奏董天弼於十月二十四日往甲金
達攻打二十七日占據牛廠十一月初一日甲金達賊人棄碉遁

去官兵見距達木巴宗四十餘里昨又聞該提督於十一月初七日分兵兩路攻奪賊人所建木城未及占據山梁被賊衝下官兵受傷及迷失者甚多且有遺失槍礮之事見飛札查明確數具奏至總兵福昌雖報稱進至鄧仍其實距山神溝僅數十里今營內見存兵一千七百餘經連次挫衄之後兵氣頹懦已極且董天弼前往木坪之時凡有將就可用者俱行挑往所存多係受傷患病之人是該鎮福昌前次之進征失挫及後此之株守無能實屬咎無可諉以目下情事而論兵力疲弱又當山路陡險冰雪凝結之時該鎮之不能速行進取亦屬實情因一時不得領兵之人暫令該鎮管領原兵以觀後效俟將來覈定奏明請旨又奏本月十三日據福昌報稱巴朗拉坐卡官兵拏住小金川番人七名押送軍營訊問並將該番所帶番稟呈送前來譯係小金川土司澤旺及

僧格桑投送都司馬詔蛟之稟僧格桑生性詭詐所具番稟旣已支離狡譎又以伊父澤旺尙存故爲同列銜名希冀稍緩大兵進討自不值復加飭諭查澤旺向日尙屬恭順若諭以僧格桑鈐制其父妄肆鴟張今大兵進勦玉石俱焚不獨小金川從此滅絕卽澤旺亦難倖逃顯戮父子之間必生離異其番目人等向爲僧格桑驅脅未必堅心出力且僧格桑連歲稱兵番人耕作久荒資生無計亦必心懷怨恨若諭以禍福勢更無難解散敬將前奉諭旨詳加演說擬繕檄文三道一諭澤旺一諭小金川頭目番眾一諭僧格桑譯寫番字於小金川遣來七人之內令結迪等四人齎檄前往報聞○甲子董天弼奏十一月初一日攻克甲金達上面山梁峒卡據守牛廠嗣於初五日夜賊番來營侵擾被我兵槍傷多人又搶獲攜牌等項軍械查由牛廠前進達木巴宗尙有路可通

小金川須先據守絕其應援初七日派兵由西北山梁前往適遇賊番據險官兵勦殺互有損傷是夜又踰溝潛來直犯牛廠營盤其東北橫亘山岡防卡各兵馳下接應不虞另有番賊衝上山岡占去石卡臣於初八初九兩日督兵奮力攻奪賊番添人堅守驟難攻克以牛廠營盤相去石卡不遠卽令漢土兵練撤上山梁於總要路口屯紮初十日夜賊番復來侵犯被官兵擊敗惟是甲金達山梁總口並各處要隘糧臺均須撥兵嚴防至甲金達相近尙有可通達木巴宗之路見在躡探進攻所有未能嚴兵防守失卡之遊擊曹永言都司福敏泰咎有攸歸臣亦未能防範周密實難辭責應請旨一併交部嚴加議處諭軍機大臣等董天弼奏已經攻得牛廠之石卡復爲賊奪去且於官兵損傷迷失及遺失槍礮之事皆隱約其詞希圖掩飾竟是深染綠營惡習甚屬不堪董天

弼屢次得而復失其咎實無可追但伊見在統兵進剿若另易生
手轉恐難於著力且一時亦難得堪勝帶兵之提督是以所請議
處不卽交部總之伊等功罪自在或尙知奮勉可以酌量相抵或
仍畏葸貽誤自速重愆絲毫不能假借此時尚難於遽定統俟成
功之日再行覈實辦理至常保住見已至甲金達軍營與董天弼
會合常保住帶兵自較綠營將領得力但伊本係烏拉齊且任總
兵數年或不免綠營習氣今與董天弼一路恐亦蹈其惡習仍不
足恃而約咱一路惟有一宋元俊稍習地理然帶兵之是否勇往
無由深悉桂林在彼不可不隨時試看策勵以期於事有益至溫
福見已馳至巴朗拉扼其要害而伍岱又係優於帶兵之人較彼
兩路自能制勝但其地山嶺險峻並與賊巢相近明卡又多進剿
亦非易事該處所有川兵不及二千且漢兵土練遇事俱不足仗

萬一稍有退阻僅存溫福所帶之滿洲兵二百名其勢未免單弱溫福前奏至彼察看事機如刻難少待卽就見有之兵奮力前進固屬勇於任事但亦不可不詳審形勢明於彼此進退之機方可進攻若銳意深入兵力不充賊人旣無所畏憚且恐約咱甲金達兩路未能同時合剿更不足以壯聲援稍有疏虞於大局甚有關繫溫福務當善體朕心加意慎重蓋天弼宋元俊兩路惟恐其懈於急攻溫福一路則惟恐銳於輕進慮念相同而於溫福尤甚將此詳悉傳諭知之○乙丑諭昨閱工部題銷順天庚寅科鄉試添補器具等項一本裘曰修卽係兼管順天府之人乃於工部堂官內仍行列銜以自行報銷之案旋復自行考覈於事理實屬未協在同堂大員秉公覈實或不敢彼此瞻顧而司員書吏人等以承辦之人見爲本部堂官豫操覈銷之柄難保無畏懼迎合情事何

可爲訓由此類推如戶工二部錢法堂侍郎專管局務若遇本部
覈奏時該侍郎亦行列銜均非覈實辦公之道嗣後在京各衙門
凡有似此者俱令一體迴避著爲例○丙寅裁廣東福建教習官
音學

十二月丁卯朔諭九公主著指配公扎蘭泰於明年成婚封爲和
碩公主一切應行典禮交該衙門照例辦理公扎蘭泰授爲散秩
大臣仍在御前行走○戊辰命溫福爲武英殿大學士兼兵部尙
書○己巳以達爾吉善爲直隸按察使

由浙江
鹽道遷

○庚午溫福等奏

臣等帶領滿洲綠營兵二千從山神溝起程十八日至向陽坪地
方察看巴朗拉山勢峻險山頂建立大礮七座又於右手山梁設
卡防守其上尙有高峰東手兩礮之間又一峰較各礮更峻若將
右手山梁卡座奪取占據高峰再將兩礮中間山峰占取向下夾

攻賊必棄礮卡而逃二十一日分派侍衛官兵將右手山梁攻克
並將兩礮中間山峰搶奪圍住賊礮連奪賊卡六座占據東面礮
後高峰賊兵二次來援俱被官兵擊敗無如所領綠營皆隨董天
弼打仗受傷心存畏怯守至二十二日子時賊人吶喊來衝兵丁
驚退將已占山峰失去臣等謹遵不可撲礮多損官兵之旨暫行
收兵卽在向陽坪駐紮此次打仗斃賊甚多滿洲綠營官兵亦有
陣亡受傷者查明辦理看來四川綠營全不可用俟黔兵到日攻
勦臣等冒昧進攻請嚴加治罪諭溫福等帶領滿洲官兵攻打巴
朗拉礮卡殺賊頗多殊屬實心任事惜其時兵數無多而綠營士
卒又皆懦怯不克成功溫福伍岱何罪之有俱著交部議敘至我
滿洲官兵不過數十名而全無顧慮惟知奮勇方不愧爲我滿洲
臣僕甚屬可嘉此內侍衛章京等有分外著績應賞給巴圖魯名

號者著溫福等奏聞賞給仍將效力官兵一併查出交與該部從優議敘所有滿洲綠營兵丁內受傷陣亡者亦著查明造冊咨部照例議卹至占闡納納蘭圖向在軍營均屬奮勇此次歿於行陣殊爲可惜著格外施恩將占闡納納蘭圖本身原有軍功世職合計此次應予何官查明加贈並將伊子帶領引見○桂林奏臣等於十八九等日用礮轟擊賊礮殘缺更甚二十一日合力分取搶占礮卡賊番驚竄生擒四殺死一百十三割首級三十一尙有不及逃出者退守寨礮我兵四面合圍賊番於東面山溝潛來救援官兵施放槍礮擊敗救援之番又擒賊二殺死三十四割首級九約咱地方已全攻獲此次進攻副將宋元俊深知威奮參將薛琮都可沈寬往來督率奮勇攻撲甚爲出力陣亡兵練三十三名其帶傷及勇往殺賊弁兵分別賞賚生擒賊番全行正法至價格桑

聞約咱已失勢必固守卡了若進取稍遲該曾得以豫爲準備查
扎功拉東山梁尙有大礮石卡數處賊番防守臣等先派兵攻奪
並分兵由西面山溝攻取喇嘛寺一面酌抽各監官兵俟東山梁
礮卡一得卽速搭橋剋期前進直取卡了諭據桂林等奏已於十
一月二十一日攻得約咱賊寨官兵合力奮擊摧奪礮卡殲斃賊
番一百四十餘名見乘賊人喪膽之時派兵繞山奪隘直取卡了
等語小金川逆酋恣肆不法罪惡難追見在官兵分路進剿桂林
等督勵將士奮勇攻獲約咱大礮自此摧堅深入不日自可擣穴
擒渠軍營大有起色副將宋元俊前因率領兵練克復明正土司
地方曾予加銜示獎茲復感恩奮勇著績戎行殊堪嘉尙著加恩
賞給總兵銜有缺卽補以示鼓勵叅將薛琮都司沈寬等協力攻
剿亦能奮往用命著一體加恩交部從優議敘阿爾泰前此節節

貽誤遷延本屬咎無可追但伊所鑄大礮此次攻碉轟擊頗爲得力一節之善朕亦不肯輕沒阿爾泰著賞給散秩大臣銜令其仍督辦糧餉軍需等項以觀後效至董天弼身任提督軍行是其專責其罪本與阿爾泰相等乃自西路進兵以來已經半載深染綠營惡習一味觀望逡巡前在德爾密已得石卡旣不能固守反攻途赴木坪一路惟知緣邊繞道曠日玩時坐失機宜比至甲金達山梁濡滯卅月致已經攻得之牛廠又得而復失且於前駐巴朗拉時所有綠營兵擇其可用者攜以自隨所餘疲憊無用之卒付之福昌全不適用以致巴朗拉一路不能剋期破壘直前夾擊其罪更重看來此次用兵始終皆由總督提督二人意存延玩所致是阿爾泰與董天弼厥罪惟均今阿爾泰旣經斥革董天弼豈宜復留原職董天弼著革去提督以兵丁留於軍營效力贖罪四川

提督員缺卽著阿桂署理董天弼交與阿桂差遣委用儻仍不知痛自檢改稍有退縮卽於軍前正法示眾無庸再行請旨朕於諸臣功罪一秉大公其人果有勞績必加獎擢如不知感奮效力亦不能稍存姑息一切賞罰悉視其人之自取將此通諭中外知之

○丁丑諭富德著加恩免罪在三等待衛上行走○戊寅諭前以批閱通鑑輯覽見前史所載遼金元人地官名率多承譌襲謬展轉失真又復銓解附會支離無當甚至於對音中曲寓褒貶尤爲鄙陋可笑蓋由章句迂生旣不能深通譯語兼且逞其私智高下其手譌以傳譌從未有能正其失者我國家當一統同文之盛凡索倫蒙古之隸臣僕供宿衛者朕皆得親爲諮訪於其言語音聲俱能一一稽考無纖微之誤是以每因摛文評史推闡及之並命館臣就遼金元史國語解內地人職官氏族及一切名物象數詳

晰釐正每條兼繫以國書證以三合切韻俾一字一音咸歸脗合並爲分類箋釋各從本來意義以次進呈朕爲親加裁定期於折衷至是一訂舊史之踳駁今金史國語解業已訂正歲事而諸史原文尙未改定若俟遼元國語續成彙定未免多需時日著交方略館卽將金史原本先行校勘除史中事實久布方策無庸復有增損外其人地職官氏族等俱依新定字音確覈改正其遼元二史俟國語解告竣後亦卽視金史之例次第釐定畫一仍添派纂修官分司其事總裁等綜理考覈分帙進覽候定用昭闡疑傳信之至意一切事宜著總裁等卽行議奏不可濡滯○吏部等部議准護理山西巡撫布政使朱珪奏平陽府屬霍州路當孔道政務衝繁請改爲直隸州以趙城靈石兩縣隸之吉州一缺所屬鄉甯一縣僻處山陬民醇事少請將吉州改爲散州與鄉甯縣並隸平

陽府轄從之○己卯寶授瑪興阿刑部左侍郎○庚辰諭福昌身
係滿洲且爲總兵大員乃自七月閒駐卧龍關外至今半載一味
逗遛觀望並未見其實心奮勉屢經傳旨訓飭今據溫福奏稱該
鎮原屬無用之人不但打仗進攻不知紀律卽尋常亦不能整飭
營伍等語福昌著革職留於軍營自備資斧效力贖罪其松潘鎮
總兵員缺卽著宋元俊補授仍令其隨桂林等帶兵進勦○辛巳
命書麟領西安八旗兵二千名赴四川軍營○乙酉以伊滿爲左
副都御史由通政使遷○庚寅溫福等奏貴州官兵於本月初十日內
到齊大礮鑄成臣等商定十二日夜不令賊人知覺派兵交待衛
三達勒等令其占據右邊山梁攻得卡座章京瑚尼爾圖等令其
占據左邊山梁侍衛廣音素等領滿洲兵總兵馬彪等領貴州兵
合力攻取山頂礮卡臣等隨後接應侍衛明仁等攜帶新鑄大礮

前進其奪據兩邊山頂之官兵乘夜上山將賊人十數處石砌攔牆全行攻克攻取山頂礮卡之兵亦至巴朗拉最高嶺下按隊排列明仁等一面放礮攻打侍衛章京鎮將等督兵直取山頂礮卡十三日官兵奮力上前先圍大礮一座天晚未能摧毀十四日黎明又令兵丁施放槍礮攻至午刻兵丁奮力衝抵不避槍矢或竟拆礮根或攀上礮頂並將相連石牆亦全奪占臣等督兵復將賊人礮卡分頭圍困至十五日將大礮六座小礮兩座又山頂石牆一座全行克取此次打仗計殲戮賊人數百名拏獲十二名卽行正法再巴朗拉係緊要隘口一切糧餉鉛藥等項俱由此路運送已派四川兵四百駐守臣等俟搜捕逃匿賊人完竣卽進兵直取達木巴宗諭溫福等奏稱帶領官兵奮勇攻破賊礮剿殺賊眾已過巴朗拉等語溫福等以滿洲官兵在前綠營官兵在後晝夜打

仗甚屬奮勉實堪嘉予似此聲勢賊人必皆膽落不日即可集勦
所有此次大臣官兵奮勇出力宜沛恩施以示鼓勵溫福著賞給
小荷包二對伍岱著賞給小荷包三箇阿桂著賞給小荷包一對
侍衛章京內奮勇著績應賞給巴圖魯名號者著溫福查明具奏
其打仗奮勉並受傷陣亡及貴州官兵一併查明送部議敘議卹
○辛卯溫福奏查巴朗拉一路乾隆十二三年征勦金川原係進
兵正道其沃克什達木巴宗小金川美諾等處皆大兵駐紮及安
設糧臺處所約咱至美諾一百六十里自巴朗拉至美諾經由沃
克什各寨統計亦止一百四五十里且巴朗拉地勢礪卡較他處
更爲險阻一經攻破已斷賊匪咽喉即可乘勢而進是以臣節次
具奏均以巴朗拉爲正路至福昌前次駐兵之鄧仍董天弼奏其
地爲山神溝緊要後路查董天弼彼時因改赴木坪進兵則山神

溝鄧仍一帶實爲後路不可不防其外軼留福昌帶兵駐守今臣
既由巴朗拉前進則山神溝鄧仍向陽坪均在營盤之後已非緊
要之地業將福昌及所駐之兵帶至軍營所有鄧仍山神溝及卧
龍關內外各站不過爲糧運臺站所經每處酌留官兵數十以資
接濟通計不過三四百名無須專派大員駐守又董天弼見駐之
甲金達原距美諾不遠前次董天弼具奏攻得牛廠摺內有西北
進兵本布爾桑岡卽去美諾不遠由東北四十里可以直救達木
巴宗若將達木巴宗攻破則扼斷巴朗拉後路等語是董天弼之
所以不徑擣賊巢因達木巴宗更近於美諾而土舍雅滿塔爾又
急求赴援之故今臣既統兵攻破巴朗拉前距達木巴宗不過八
九十里如何分擣達木巴宗及美諾之處當與阿桂相機酌辦報
聞○癸巳溫福阿桂奏臣等於本月十三四五等日攻克巴朗拉

將賊人險要礪卡拆毀派兵接捕獲賊數名均已正法臣等次日
起程行過巴朗拉山梁道險冰滑前抵松林口內有礪卡數座賊
先遁去又次日帶兵前抵日隆宗賊亦望風逃竄所有日隆宗寨
內沃克什番眾六名賊於臨去時殺死五人僅有阿瓊一名臨時
逃出臣等詳加詢問據稱本月十六日早閒聞小金川頭目七圖
安堵爾使人傳說大兵攻打巴朗拉若巴朗拉失守松林口日隆
宗斷難守禦汝等應卽移往資哩是日又聞傳說甲金達提督大
兵又從蒲松岡一路抄來小金川兵已逃一半就要進至達木巴
宗對面十五日又見畢旺拉德爾密守卡賊人因巴朗拉已破退
回其守日隆宗之頭人魯勒爾卽帶賊眾竄去等語臣等正在查
辦閒所有跟隨常保住董天弼之侍衛哈爾九等從達木巴宗來
至日隆宗稱董天弼等於本月初八日由蒲松岡小路進兵十四

日早已抵達木巴宗賊人卽來接仗官兵獲勝賊人於是日逃竄救出沃克什土司並攻得木耳宗等語是晚沃克什土司召達克拉來營進見稱土司懦弱無能爲僧格桑欺陵占據各寨並圍達木巴宗寨內見存三百餘人僧格桑屢次偪降土司因世受天恩斷不肯爲其所屬如今糧食已盡衆大兵垂救餘生土司惟有世子孫感戴鴻恩等語臣等諭以僧格桑侵擾爾境並敢抗拒大兵實爲罪大惡極爾能堅守數月實屬可嘉見在官兵已將爾各土境克復爾當招集百姓令乘時耕種加意撫綏並宜安分毋釀事端至爾地方百姓不忍再派出兵惟派熟識道路之人十數名以供隨營差遣該土司聞言叩謝去訖臣等又於次日前抵達木巴宗召達克拉將從前被圍時打仗擒獲賊人及此次突圍夾擊所獲一同獻出臣等並將沿途所獲賊衆共二十名逐一嚴訊錄

取供詞進呈外卽將各犯悉行正法其自巴朗拉至達木巴宗舊有寨落百餘處俱交各土司收管至阿桂仰蒙恩命署理提督印務茲董天弼已抵達木巴宗臣阿桂卽行接印任事見將該管一切事宜竭力整頓卽與臣溫福合力進剿得旨兩路官兵會合正當乘勝進攻務擒僧格桑以完此事速待捷音之至○桂林奏臣進攻卡了地方因喇嘛寺賊人據險防守我兵不能繞越山梁隘口進取甲木特遣喇嘛二名密赴該寺暗行勾結昨喇嘛回稱寺內喇嘛因賊番屯占均已散住他處僅存五名以供香火據稱我等極願投誠奈賊番看守嚴密難以內應等語臣思旣已差人查探若遲延走漏消息恐反墮其術中當與阿爾泰商酌令總兵宋元俊等統率官兵於十六日密赴山梁守備陳定國帶領熟習山路漢土官兵潛由山梁進發轉至該寺附近處暗伏約定次日山

前礮響卽行攻奪臣同阿爾泰鐵保督同總兵英泰帶領兵練於
黎明時施放大礮排槍進逼卡了俾賊番悉眾來拒不能兼顧宋
元俊等已豫飭派伏兵突出奮攻砍奪木柵賊番猝不及備止於
礮內放槍擲石我兵乘勢搶進木城賊番驚棄奔逃我兵分路追
擊殺死賊番九十三帶回乞降喇嘛五攻破木城八小木城石卡
二十六喇嘛寺礮寨二十八搶占該寺東向之墨爾多山梁一道
一面派撥官兵分駐東向山梁斷絕西山梁賊礮小道一面占據
南北隘口密探山後路徑以便進趨甲木並訪聞甲木地方尙有
別路可通僧格宗而僧格宗爲賊酋緊要礮寨若果得聞道可通
進取更捷惟是賊酋見喇嘛寺已失必於各隘嚴防因令探路員
弁密查籌辦見在督率將領等進取卡了賊番僅於礮眼內放槍
並不對仗而官兵士練等威奮倍常有可乘之機卽鼓勇向前萬

不敢少存顧慮坐失機宜得旨一切布置合宜欣慰覽之於無意
中用汝竟能得力亦賴半載在軍機處日聽朕訓也今溫福等已
過巴朗拉解達木巴宗之圍正逆賊喪膽之時不日卽聞捷音矣
○甲午撥庫銀五十萬兩修直隸河工○乙未顯親王衍潢薨諭
顯親王薨逝著加恩派散秩大臣一員帶領侍衛十員攜茶酒前
往賜奠所有應得典禮著各該衙門察例具奏尋予祭葬諡曰謹
○是歲朝鮮南掌來貢○會計天下民穀數各省通共大小男婦
二萬一千四百六十萬三百五十六名口各省通共存倉米穀三
千八百九萬七千四十五石七斗五升三勺